

文公直編

上海新光書店出版

俄羅斯侵略中國痛史

王正廷題



上海图书馆藏书



A541 212 0012 55268

# 俄羅斯侵略中國痛史序

與我國陸地相連者。厥爲俄國。而帝  
俄素抱帝國主義。自與我國交通。卽  
一以侵略畧爲念。蠶食不遺餘力。歷年  
以來。虜劉我邊陲。致我東北地數  
百萬方里。其間我國所受壓迫。脅  
之痛苦。誠有不可忍言。且公理者。十  
月革命後之蘇俄。雖侈談公理。而其  
對於外蒙古之誘致。其心實有不堪  
問者。凡此種種。皆我之痛史。一亟

宜昭示國人。俾知憬惕者也。文公直  
少將。曾躍馬蒙疆。而又熟於掌故。搜  
集。俄羅斯侵略我邊陲之史料甚夥。  
前曾陸續撰文告世。邇復著爲專書。  
事實敘述。首尾貫串。詳盡靡遺。而於  
失地。耻辱情形。記載尤爲翔實。讀之。  
足以使國人激厲奮揚。思湔舊耻。誠  
廉頑立懦之傑作也。鉛槧旣正。受讀  
一過。欽佩無似。爰樂爲之序。以告國  
人。及後之來者。

古墓姜俠魂


廿八，五，三。

# 俄羅斯侵略中國痛史目次

序

## 第一章 蒙邊地域之喪失

- 一 俄人侵略烏帶河等處……………一八
- 二 俄人侵占伊聶謝斯科……………二一
- 三 俄人侵略精奇里及海蘭泡……………二三
- 四 俄人侵略雅爾舊城一帶……………二四
- 五 俄人侵略烏梁海二旗牧地……………二五
- 六 俄人侵略溫都布拉克一帶地……………二七
- 七 俄人侵略克爾根達什以上六牌博地……………二九
- 八 俄人侵略巴爾魯克山……………三〇



九	俄人侵略烏勒昆烏拉斯河等處	三三
一〇	俄人侵略伊犁河北岸一帶地	三四
一一	俄人侵略霍爾果斯河……喀爾達板等處	三六
一二	俄人侵略阿勒坦特布什山等處	四五
一三	俄人侵略納林廓勒圖永等處	四九
一四	俄人侵略齋桑淖爾以東以南之地	五二
一五	俄人侵略哈薩克夏季游牧地	五六
一六	俄人侵略瑪里他巴霍斯庫魯克等處	五九
一七	俄人侵略伊西洱庫爾	六二
一八	俄人侵略帕米爾大地之一部分	六四
一九	俄人侵略尼布楚及額爾右納河右岸之地	七四
二〇	俄人侵略烏里雅蘇臺以西之地	八一

二一	俄人侵略科布多所屬邊界十三處牌樓地	八二
二二	俄人侵略烏梁海一貂之地	八四
二三	俄人侵略吉黑蒙疆西域回部諸邊地	八五
二四	俄人侵略布魯特	八七
二五	俄人侵略塔什干	八八
二六	俄人侵略布哈爾	八九
二七	俄人侵略浩罕汗國	九一
二八	俄人侵占伊犁勒索權利	九四
二九	俄人計侵滿洲	九六
第二章	中俄蒙交涉	一一一——一五九
一	中俄之蒙古衝突	一一二
二	日俄同盟	一二八

三	白俄赤俄之誘蒙占蒙……………	一四〇
第三章	中俄復交與中俄協定……………	一六〇——一九四
一	東路碑及哈市政權之收回……………	一六〇
二	俄租界及治外法權之收回……………	一六六
三	中俄協定之締結……………	一七〇
四	大使之遣派……………	一九〇



# 俄羅斯侵略中國痛史

編者 文公直

## 第一章 蒙邊地域之喪失

俄蒙協約發見。全國之視聽。曾集注於此。卒以國力不敵。竟於二年十一月五日結認許外蒙自治之中俄協約。國人痛焉。茲將歷來俄人侵略之迹。彙述於篇。想亦爲閱者所樂聞也。溯查俄自大俾得帝之世。卽有志於遠東。前清康熙三十二年。鄂羅斯察漢汗遣使來聘。康熙帝諭羣臣曰。鄂羅斯國人材頗健。但其性偏執。論理亦多膠滯。從古未通中國。距京師甚遠。然從陸路可通彼處。自嘉峪關行十一二日至哈密。自哈密行十二三日至吐魯番。吐魯番有五種部落。過吐魯番卽鄂羅斯之境。聞其國遼闊。有二萬餘里。漢時張騫曾出使西域。或卽彼處地方。明永樂雖經出塞。

彼時以爲甚遠。按其所至之地。離此亦不過千餘里。史書所載。霍去病曾出塞五千里。想或有之。今塞外尙有碑記可考。至外藩朝貢。雖屬盛事。恐傳至後世。未必不因此反生事端總之。中國安甯。則外蠻不作。故當以培養元氣爲根本要務耳。云云。所稱鄂羅斯者。卽俄羅斯也。察漢汗卽大俾得也。俄使來聘。而曰外藩朝貢。誇大之詞也。然康熙帝當滿清鼎盛之時。卽料及後世。因此生事端。林則徐之逆料俄患。不能專美於前矣。

清初。俄屬西伯利亞部民。時來侵擾邊境。當時目之爲羅刹。絕域紀畧云。有邏車國者。騁諸夷使不得貢。敵之不勝。又動大衆。勤舟師。遂擇八旗兵八十人長戍焉。邏車。卽俄羅斯也。柳邊紀略言。船廠設于順治十八年。昂邦章京薩兒吾代造船於此。所以征俄羅斯也。吳振臣甯古塔紀略云。余五歲時。邏車國人造反。到黑龍江諸處。搶貂皮。鋒甚銳。其國在大洋

東相去萬里。所產多羅絨。漆器最精。人皆深眼高鼻。綠睛紅髮。其猛如虎。善放鳥槍。有名西瓜礮者。其形如西瓜。量敵營之遠近。雖數里外。必到敵營始裂。遇者必死。滿洲人皆畏之。將軍上疏求救。卽奉檄凡流人隨旗下。及年逾六旬者。着一概皆役云云。時康熙七年也。先是俄國人哈巴羅甫懷遠征黑龍江之壯志。於一六四九年。卽清順治六年。上書於俄帝。請行。翌年抵雅克薩城。與滿洲軍相薄。遂接戰。自晡至暮。滿洲兵死者甚多。鞭馬奔竄下海。哈巴羅甫乃取雅克薩。更分百三十五人乘小舟追躡土族。此隊終夜下河。天明達酋長阿最之部落。有前一夕由雅克薩逃至之列弗加族人。知俄兵勇悍難禦。縱其燒家屋。逃走下流。俄兵復窮追之。自朝至午。及之。再戰。戮過半。俄兵傷者九名。獲家畜百十七頭。還軍雅克薩。旣而哈巴羅甫留兵守雅克薩。自率衆備鉅礮二尊。及軍銃。大舉下河。十

日與滿洲兵遇。此地酋長集衆以當俄軍。自晨至昏。悉以巨礮殲之。時方嚴冬。河上冰結。不能更進。於是哈巴羅甫直遡河至黑龍江上流。設城堡。與前年所設陸地堡塞相接。其間步行可二日程。新城之旁。土地宜耕種。哈巴羅甫就所獲俘虜詢問各部落之情形。俘虜等告之曰。黑龍江之上流。有無所服從之一二酋長。料彼等決不能敵俄兵。可直降服之。惟黑龍江下流諸酋長。先雖逃走。方屯集大部落。待滿洲皇帝救兵之來也。哈巴羅甫據以報之。俄國亞庫克城守。請其奏達俄帝。并將酋長所獻之物。與其他所獲轉獻於俄帝。計黑貂皮一百六十六枚。膽四十六枚。毛皮衣一領。亞庫克城守後奏俄帝云。今新得黑龍江一帶地。農功漁獵牧畜。無不適宜。足以爲俄國之殖民地。順治八年。俄國亞庫克城守送援兵於哈巴羅甫。兵皆裝軍銃。哈巴羅甫既得援兵。如虎添翼。勢益張。諸酋長降者頗

衆。此報傳至中國。大驚。急整軍旅進圍雅克薩城。哈巴羅甫迎擊。退之。發急使至亞克庫城告變。且請援兵。援兵既至。哈巴羅甫牽之下黑龍江。大示威諸土族。此行雖遠出。未得至黑龍江口而歸。俄京莫斯科得雅克薩等地酋長所獻物。及黑龍江地方征服之事蹟。自俄帝以至於市民。無不驚歎其功績之偉大。因其時滿洲皇帝封禁黑龍江等處。地方多不得通行。俄人如入無人之境。中國亦莫由而知之也。於是哈巴羅甫蒙俄帝召見。受殊遇。爲列拏地方官。別派鐵巴諾夫爲雅克薩城守。鐵巴諾夫下黑龍江。順治十一年六月六日。與滿洲大兵相會。滿兵或在馬上。或在舟中。水陸並進。大破鐵巴諾夫軍之一隊。部下大率戰死。鐵巴諾夫退至科馬爾河口。築城堡自守。翌年春。滿洲兵萬餘圍城堡。自三月十四日至四月四日。晝夜急攻。城兵死守。滿洲兵不能拔而退。翌年滿洲酋長下令攘逐。

黑龍江地方某某土族。鐵巴諾夫忽失所收貢物。未幾糧食亦盡。掘草根食之。順治十五年。鐵巴諾夫棄城欲還。中道復爲滿洲兵襲擊。鐵巴諾夫戰死。部下兵亦死亡大半。中國悉復黑龍江地。及俄國女帝蘇非亞在位。康熙二十四年。滿洲兵再攻雅克薩。圍攻甚力。俄國城守多符金不能盡力防禦。城遂陷。是役多符金知其兵力非滿兵之敵。引其城中兵士。安然遠遁。有俄兵二十五人。爲滿兵所擒。

雅克薩戰報之達亞庫克也。城守急遣哥薩克兵六百及德國人比敦往援。途中復收多符金敗兵百三十六人。共向雅克薩。以圖恢復。比敦築堅壘高垣。爲戰守之備。一六八六年七月。滿洲兵八千忽逼城下。城中亦築壘相對。九月一日。滿洲兵集衆奮進。爲俄兵所擊退。多符金中彈死。比敦代領城衆。是時雅克薩城中有可耕之地。城兵糧食充實。滿洲兵設長

圍。至翌年五月。知其終不可拔。解圍去。滿洲兵退後。城兵整理子遺。重建市屋。修繕殘破。稍復舊觀。康熙二十八年。中俄締結尼布楚條約。雅庫薩及黑龍江諸地復歸於中國。此約以外興安嶺爲界。山之北盡屬於俄。額爾古納河之右岸亦歸俄屬。滿洲數千里之地。盡入俄國版圖。俄人所獲中國土地亦不爲少矣。

先是。哈巴羅甫之遠征隊。入黑龍江地方。掃蕩土族之巢窟。終爲清廷所聞。以爲俄國之侵略。不但對土族。且有日逼中國之虞。西曆一千六百七十年。卽康熙九年。清廷遣使赴俄京謁俄帝。告以黑龍江及松花江等處俄國哥薩克之無狀。且有所要請。俄國亦因之遣使者西拿納夫自尼布楚至北京。清廷厚遇其使者。與國書與之。以答俄帝。於是邊境之爭暫息。其後。清廷要請。不但黑龍江之地。禁哥薩克之跋扈。並欲於設阿地方

禁俄人徵貢。一千六百八十六年。清廷以俄人擾邊。復治舟師。謀大征之。命都統彭春等往圍雅克薩。於是俄帝欲與清廷訂議界約。一千六百八十六年之末。俄以格拉哥仁爲全權使者。以三百銃兵衛之。由莫斯科出發。至多薄利士。厚備礮彈之屬。十月二十五日。抵色林根士。告於清廷。謂奉命爲專使議界。清廷亦派全權使者索額圖會議。使者至中國。往復殆越一年。議約時。格拉哥仁欲以黑龍江爲清俄兩國界綫。清廷固執不可。謂黑龍江兩岸一帶之地。悉爲清領。清以貝加爾湖東岸之蘇亞德納士地方。爲兩國之界。議十四日不決。是議。蓋欲舉薩貝加爾之地。悉歸之清人之手。實俄使之不能擅主者。清使知議終不就。遂撤營欲還。且盛設戰備。俄使惶懼。不知所措。乃賄隨行之兩歐人。使說清使續議。一千六百八十九年。卽康熙二十八年。約遂定。卽所謂尼布楚條約也。是約以漢滿拉



提諾、蒙古、俄羅斯、五體文字。勒石於黑龍江兩岸。茲將漢文之原稿。照錄如左。

一將由北流入黑龍江之綽爾納。卽烏倫穆河相近格爾必齊河爲界。從此河上流之右大興安嶺以至於海。凡嶺南一帶流入黑龍江之溪河。盡屬我界。其嶺北一帶之溪河。盡屬俄羅斯國界。

一將流入黑龍江之額爾古納河爲界。河之南岸爲我屬。河之北岸爲俄羅斯屬。其南岸之眉勒爾喀河口。所有俄羅斯房舍。行遷移北岸。一雅克薩之地。俄羅斯所治之城。盡行毀除。所居俄羅斯人民。及諸用物。聽撤往察罕汗之地。

一兩國獵戶人等。毋許越界。如有三小人擅自越界捕獵偷盜者。卽行擒拿。送所在官司。準所犯輕重懲處。若十數相聚。持械捕獵。殺人搶

掠者必奉聞卽行正法。雖有一二人犯禁。彼此仍相和好。毋起釁端。一從前我大清國所有俄羅斯之人。及俄羅斯國所有我大清國之人。仍留如舊。不必遣回。嗣後有逃亡者。不許收留。卽行送還。

一和好既定。以後一切行旅。有准令往來文票者。許其貿易不禁。

彼得大帝幼時嘗聞此事。其後愈不能忘情於遠東。嘗曰。我俄人必於黑龍江口大洋之面建我都府。然帝之一世。不遑致力於是。一千七百二十五年。齋志以歿。其後兩國議界事屢起。一千七百二十七年。卽雍正五年。俄使格拉格金克與清國議界務。清廷命郡王策凌伯四格、侍郎圖理琛等與俄使薩瓦等議定庫楚河等邊界。於是有恰克圖條約十一款。既而俄屬之疵善姆族人。漸入清國領地。清國人不堪其擾。遂讓出黑龍江左岸。轉移於南方之倫河。境上之地殆空。由是俄之獵犬農民。逐漸南下。

時。俄廷屢遣人檢查境上之標柱。俄帝阿加鐵利拿二世。尤注意於黑龍江之地。嘗言使黑龍江爲僅通堪察加之道路。俄國尤不可不領有之。俄帝欲達此目的。務使不動清廷之意。亞歷山大第一世繼之。常蒐集清國境上軍備。及黑龍江航行各種之報告。而得清廷之許諾。於黑龍江口置俄國貿易事務官。一千八百十六年。卽嘉慶二十一年。始設俄國北美貿易商會事務所於此。

一千八百五十二年。卽咸豐二年。俄以僧正恩納根奇爲亞庫克總督。究心黑龍江之往來。閱十餘年。精察百端。無所不慮。每三年輒遣官吏巡視黑龍江之地。當時清政府嚴禁俄人往來黑龍江地及江上之航行也。俄之設謀。甚爲秘密。而先着手於黑龍江口。嘗使俄美商之船舶來此地。一千八百五十年。距江口不遠之處。設俄人之公局。標其外以爲俄美商

會之倉庫。一若與俄政府毫無關繫者。於是始開黑龍江口移民之端。終至江口岸上開尼古刺士克港。已而俄帝准其臣毛刺維玉之請。使爲黑龍江偵察之行。頻行。俄帝諭之曰。萬事宜慎。勿與中國開畔端。一千八百五十四年二月。毛刺維玉自俄京聖彼得堡出發。直向西伯利亞長行。既抵黑龍江。乃遵海而進。一行凡八百人。輪船以外。有船四十八艘。所見沿岸居民鮮少。偶有二三家人。以葦覆蓋。見俄水軍至。皆隱其形。是實清國所置河上之守兵也。及至愛琿。都統與吏員三人出迎。設宴招待。惟不許俄人入城內。且告以此行無清廷護照。不得更至下游。毛刺維玉狡詞以對曰。此行挾多數之船。難復遡流而上。且雖從河口航下。亦無何能爲。辨論久之。遂無所禁。清吏惟請俄人速離此地而已。據俄人謂。岸上清國所備之巨礮。悉爲木製者云。俄國水軍。經松花江。烏蘇里江。兩大河口。河邊

多哥利多族所居。見俄水軍至。則皆驚怖。無敢近者。由是下流。逢門昆族。彼見俄舟。如遇怪物。皆縮頭而避。俄水軍達馬林士。此地有巨礮一尊。清國兵卒屯在者。僅五人耳。沿途森林密茂。俄人使百人伐木開道。如入無人之境。留哥薩克兵二人。巨礮二尊於馬林士。水軍復進。而下抵黑龍江之末流。目的已達。遂歸報聖彼得堡。而俄帝經略東方之志愈決。

一千八百五十五年。即咸豐五年。毛刺維玉將軍以書送清廷。請明定黑龍江所屬。其略曰。俄國一日與英法開釁。彼等攻擊我東方領地。益進而晝占領黑龍江全部之策。既於前年以兵艦六艘攻擊堪察加。俄兵擊退之。俄帝不僅爲本國之土地人民而已。實爲二百年來比鄰相好之貴國。命將遠征。以期完繕東方之軍備。而防英人之侵略也。毛刺維玉將軍欲使清國知俄國與英開戰之日。有出大軍於黑龍江之意。得速遣其全

權之使。及議約。毛刺維玉將軍力爭中俄兩國當以黑龍江明定境界。清國使者大驚。出於意外。以爲如是。非清國政府所以委任遠來之意。直辭而去。清帝以爲毛刺維玉將軍不待俄帝之命。專橫自恣。一八五六年。使都統三人。聯名致書於俄帝。告以毛刺維玉將軍所主議如此。以不敢報知清廷爲辭。而是時俄人益進黑龍江之地。處處設市府矣。厥後。俄帝公布黑龍江上俄國之權利。於江口尼古刺由府置總督。開黑龍江航行貿易之自由。至是清廷始知毛刺維玉將軍之所經營。非出專擅。固俄帝所授意。且委任以全權者也。

清廷得毛刺維玉將軍書時。值英法聯軍攻陷廣東。國事危急事之際。黑龍江之利害。不遑顧及。乃急還報。謂。毋因暫時齟齬。敗二百年來比鄰交好之誼。且速命主權使者議界事。一八五八年。即咸豐八年三月。毛刺

維玉將軍復以書促之。且告曰。本年奉俄帝之命。盛殖人民於西伯利亞。不但黑龍江地方而已。且將及烏蘇里江之旁。是年四月。黑龍江冰解之際。毛刺維玉與恩納根奇二臺同舟下河。欲見清使議界務。清來至愛璦。請毛刺維玉相見。毛刺維玉始稱病不親臨會議。別使僚吏五人。至愛璦與清使相見。開議二日。清使唯許黑龍江上自由航行及通商。其餘悉行拒絕。毛刺維玉夙知所議事體重大。非容易了結。故先使僚吏與議。得聞其要領。乃親晤清使。悍然堅執初說。清使不聽。毛刺維玉乃勃然變色。顧譯官曰。余所言祇此而已。拂袖竟去。是日。清使果遣吏卑詞請續議。且約不激將軍之怒。於是續議。一八五八年五月十六日。遂定約。或謂清使奔山。實受俄人重賂云。爾後中俄兩國境界。以黑龍江、烏蘇里河爲限。黑龍江之左。烏蘇里江之右。曠遠無垠之沃野。都歸俄國版圖。所謂愛璦條約。

者是也。茲將約文之要點。節錄於左。

一 黑龍江、松花江、左岸。由額爾古納河至松花江海口。作爲俄羅斯國所屬之地。右岸順江流。至烏蘇里河。作爲中國所屬之地。由烏蘇里河往彼至海所有之地。此地如同接連兩國交界。明定兩間之地方。作爲兩國共管之地。由黑龍江、松花江、烏蘇里河。此後祇准中國俄國行船。各別外國船隻。不准由此江河行走。黑龍江左岸。由精奇里河以南至豁爾莫勒屯。原住之滿洲人等。照舊准其各在所住屯中。永遠居住。仍着滿洲國大臣官員管理。俄羅斯人等和好。不得侵犯。一 以土基斯丹境內巴吉士湖與益昔湖之地。讓與俄國。

此約聲明以黑龍江定兩國界。盡以黑龍江外之大地歸俄國。由烏蘇里江至於海。作爲兩國共有之地。並許俄人通行松花江及烏蘇里江。是



年俄人置黑龍江省。以伯拉照夫深斯克爲首府。世人稱俄國所屬之阿穆爾省爲西黑龍江。稱中國所屬之黑龍江省爲東黑龍江。阿穆爾實中國所屬之黑龍江地。爲俄人所侵略者也。

一千八百六十年。卽咸豐十年。英法連軍逼白河。天津陷。帝后奔熱河。使恭親王留守北京。與英法議和。大爲狼狽。而俄國駐北京公使伊固那休夫。爲清國斡旋於英法兩公使之間。和約告成。俄使貪爲己功。於是清俄兩國。以權利酬報問題。更結疆界條約。所謂北京條約者是也。是役。俄使掉三寸之舌。不血刃而坐收烏蘇里江九十萬三千英方里空虛之地。其境界自烏蘇里河注入大海之處起。至今之彼得大帝灣止。所有烏蘇里河與凱湖白棱河瑚布圖河琿春河圖們江以東之地。南及朝鮮。席捲囊括。并於彼得大帝灣設海參威軍港。於一千八百七十二年。移極東海

軍根據地尼古拉斯科於其地。虎視東洋。屹成重鎮。今俄屬東海濱省南半繁盛之區。卽昔時中國所謂失去空曠之地也。計俄國先後侵占中國黑龍江之地。在百萬英方里以外。其面積可比兩江閩浙數省之大。茲將俄人歷來侵略中國領地及屬國彙述於左。

## 一 俄人侵略烏帶河等處

烏帶河一地。雍正九年五月初七日。經中國理藩院尙書圖理琛會同俄官伊立禮在恰克圖所議界約。曾聲明該地爲兩國兩間之地。其約第七條云。

烏帶河等處。前經內大臣松會議。將此處暫置爲兩間之地。嗣後或遣使或行文定議等語在案。今定議你（指俄使）返回時務將你們人

(指俄人)嚴禁。儻越境前來。被我們人(指中國)擊獲。必加懲處。儻我們人有越境前去者。你們亦加懲處。此烏帶河等處地方。既不能議。仍照照會暫置爲兩間之地。你們人亦不可占據此等地。

此約文。卽康熙二十八年內大臣索額圖所定黑龍江界約第一條後半之語。滿文俄文英文法文西國所傳各本。均有此語。惟漢文無有。今其地已在界牌鄂博之外。隸屬於俄矣。又黑龍江外紀所記分界盟約亦云。烏第河以南興安嶺(興安滿文卽山嶺。不必用嶺字。今姑從舊文)中間所有地方河道暫行存放。俟各還國察明復。或遣使或行文再行定議。按烏第卽烏帶。舊圖作烏底河。新圖作烏得河。源出朱格朱爾嶺東北流至河源之東偏北十三度一百八十里攸究<sub>兒</sub>河口。攸究棍河源出河口之北偏西一度一百四十五里。南流入烏得河。烏得河又流至攸究棍河口。

之東偏北九度三十分一百六十四里舍威里河口。舍威里河源出河口  
 之西偏南四十度三百又五里。東北流至河口之南。偏西二十九度一百  
 又六里。受自西來之蘭河。又東北流入烏得河。烏得河復流至舍威里河  
 口之東偏北十九度輟曼爾河口。輟曼爾河源出河口之西偏北四十度  
 一百九十里。東南流入烏得河。烏得河復流至輟曼爾河口之東偏北十  
 度五十五里托努穆河口。托努穆河源出河口之東偏南四十四度三十  
 分一百五十里。西北流入烏得河。烏得河復流至托努穆河口之東偏北  
 二十七度七十四里。過烏得斯克南。復流至烏得斯克南之東偏北二度  
 三十八里。會瑪雅河。瑪雅河源出會處之西偏北三十四度五百又五里。  
 東南流與烏得河會。二河既會。復流至會處之東偏北三十七度一百里  
 入海。其海口曰烏得海灣。烏得海灣之東南爲圖古爾海灣。又東南爲烏

里班海灣二海灣之南卽奇溫嶺。及鄂普洛斯山一帶。外紀所謂興安嶺以北。卽指奇溫鄂普洛斯雅瑪等山嶺之地。其北適在烏帶河以南。雖代遠年湮。紀載不詳。而山河之形勢固在。尙可準望得之。是則烏帶河南之地。實爲當時甄脫。自額爾古訥河口至滅瓦禪嶺盡海處。皆康熙時舊界。今爲俄人所有者。因咸豐八年內地髮捻之亂。英法復有事於廣東。俄人乘隙。以防英人行駛黑龍江爲辭。欲割據黑龍江以北之地。滿將軍奔山受賄。貿然允之。且以從權酌辦免啓邊釁奏聞。清廷以時艱孔亟。遂不暇計及。於是自額爾古訥河石勒喀河會流處以東傍黑龍江爲界。昔本兩間之地。今全歸俄國版圖。蠶食鯨吞。至於此極。

## 二 俄人侵佔伊聶謝斯科

伊聶謝斯科今屬西伯利部。滿清一統志。四裔攷異域錄。並作伊聶謝柏興。內府圖作惹尼色斯歸城。總託作華尼西阿志略作也尼塞斯科。一作云益士備攷作也尼塞斯各全志作也尼斯科。皆一地也。其地昔爲索倫別部。喀木尼堪部衆居焉。即使鹿部也。滿清崇德元年五月。阿賴達爾漢追毛明安（即茂明茂）部下逃人至使鹿部喀木尼漢地方。獲男女二十九人。其地駕車耕田。使鹿若使牛馬。俄羅斯人呼索倫爲喀穆尼漢。即喀木尼堪也。滿洲人不知保全屬部之義務。俄羅斯兵自托波爾擴地而東。至伊聶謝喀木尼堪部衆皆降。遂收其地。設俄官統治之。其地爲中國發源之色楞格河。大克穆河。伊聶謝河。昂噶拉河流域地。關繫實非淺尠。讀色楞格河源流攷者所當知也。地與喀爾喀蒙古及烏梁海諸部接壤。康熙中滿使圖理琛嘗由額爾口城舟行三千餘里。經伊聶謝柏興而至。

烏斯乞木地方。又查伊聶謝斯科爲匈奴之北境。鮮卑突厥諸國相繼有其地。唐爲骨利幹國地。元爲昂可刺部地。明時曰加大閣辣。卽昂可刺之轉音也。

### 三 俄人侵略精奇里及海蘭泡

精奇里江卽淨溪里河。又名黃水。以水色黃故也。黑龍江之水黑。故黑黃二水並稱。海蘭泡又名布拉郭威什臣斯克。居黑黃二水交匯之間。咸豐四年五月。俄將軍木哩斐岳福（卽毛刺維玉）始犯境。次年卽於海蘭泡立屯。其處南距愛瑯城僅七十里。愛瑯有清國副都統駐焉。乃俄人公然於數十里外立屯。而中國邊臣無過問者。俄人得隴望蜀。於是咸豐八年遂圖割中國江北之地。海蘭泡今爲阿穆爾（卽阿姆爾）亦卽黑龍江

也。部會城。阿穆爾部。卽俄人割去中國黑龍江北外興安嶺之地位。海蘭泡之西南。黑龍江南岸。爲黑河屯卽中俄互市處也。精奇里江兩岸產金。俄人設廠採之。

#### 四 俄人侵略雅爾舊城一帶

塔爾巴哈臺建城之地。其舊名曰楚呼楚。今西人尙沿舊稱。該城之西約二百里。有地曰雅爾。舊本土爾扈特游牧地。當西域初定。塔爾巴哈臺與雅爾均有駐兵。乾隆二十九年。中國參贊大臣綽勒多。由烏魯木齊率綠營兵六百名屯殖於雅爾地方。建築城垣。命名肇豐。周二里四分。高一丈五尺。東門曰翔和。南門曰乘維。西門曰布說。北門曰暨朔。有京健兩營兵駐防。乾隆三十一年。參贊大臣阿桂奏稱。雅爾之地。向來雪大。而牧場



遙遠。近城所有地畝。不敷兵丁五百人耕種。悉心查勘。得塔爾巴哈臺山。陽鄂畢持之舊游牧地。曰楚呼楚。田土膏腴。水不充足。牧馬之處。既不甚遠。無庸動卡座。地方形勢。亦頗佳勝。請將雅爾城移於楚呼楚。於是建綏靖城。及同治三年。中俄兩國勘定邊界。而雅爾舊城一帶地。割隸於俄。據西人紀載。謂其城之故址。尙存云。

## 五 俄人侵略烏梁海二旗游牧地

同治三年。勘辦西北界務大臣明誼。會同俄國使臣在塔爾哈巴臺議。自沙賓達巴哈至葱嶺之界。名曰塔城之約。以返修改界約。均以塔約爲底本。每改修必蹙地。輒以能守塔約舊界爲幸。殊不知塔約之界。較舊圖不合者甚多。如沙賓達巴哈以西。阿克喀巴河源以北。新圖之阿巴堪河。

卽舊圖之阿穆哈河。新圖之畢雅河。卽舊圖之阿爾泰河。新圖之帖列次  
 闊業湖。卽舊圖之阿爾泰諾爾。定邊左副將軍所轄之烏梁海二旗。卽跨  
 阿爾泰諾爾而游牧者。今皆已在界外而入於俄矣。侍郎洪鈞所譯俄界  
 圖。於畢雅河西有厄魯特人牧地字。是俄人以烏梁海爲厄魯特。其地如  
 故。其人之游牧如故。但不屬之於中國。因咸豐十年北京立約有西疆未  
 定之界。此後應順山嶺大河及現在中國當駐卡倫一語。中國卡倫本有  
 常駐移設之分。移設者或春秋遞移。或春夏遞移。或春夏秋遞移。卽更番  
 而戍之意。其地在極邊。常駐則距城甚近。立約者既貿然以常駐爲言。俄  
 人卽堅執不改。以肆其蠶鯨之慾。西界從此蹙矣。自沙賓達巴哈至博果  
 蘇克一段。爲同治九年所定。自博果蘇克至阿克喀巴河源一段。爲同治  
 八年所定。皆與塔約合。自巴克喀巴河源以西南。則爲光緒七年修改之

界。又非塔約舊界矣。

## 六 俄人侵略溫都布拉克一帶地

自春濟卡倫東。由特穆爾里克山項至格根河源。河源之山。卽格登山。山東卽溫都布拉克諸水所自出。格登爲伊犁鎮山。乾隆二十五年有告祭格登鄂拉文。又有歲祭文。蓋滿人在此一帶地所建武功不少也。山巔有方碑。四面分勒滿文漢文回部文唐古文。上刻清高宗手製平定準噶爾勒銘格登山文。其文曰。

格登之崔嵬。賊固其壘。我師堂堂。其固自摧。格登之巖辭。賊營其穴。我師洸洸。其營若綴。師行如流。渡伊犁川。粵有前度。爲我具船。渡河八日。遂抵格登。面淖背巖。藉一昏冥。日擣厥虛。日殲厥旅。豈不易易。將韜我

武將韜我武。詎曰養寇。曰有後謀。大功近就。彼衆我臣。已有成辭。火炎崑岡。懼乖皇茲。三巴圖魯。二十二卒。夜斫賊營。萬衆股栗。人各一心。孰爲汝守。汝頑不靈。尙竄以走。誰其納之。縛獻軍門。迫悔其遲。於恒有言。曰殺甯育。受俘赦之。光我擴度。漢置都護。唐拜將軍。費賂勞衆。弗服費臣。旣臣斯恩。旣服斯義。勒銘格登。永詔斯世。

同治三年塔城記約所分之界。溫都布拉克水。尙屬中國。則此碑尙在界內。迨光緒八年勘界時。將溫都布拉克一帶水源地。地劃隸於俄。而滿人所謂祖宗御製之碑。今已不知歸於何有之鄉。旣非同治三年所定之界。又非光緒七年所擬之界也。又此約以格登山爲中外分水嶺。雖未載明山口。按西人新圖。當以烏別圖脫及薩爾提格薩爾烏塔珠瑪各山口爲界。凡定界於山脈攢聚之處。尤以分水嶺爲最要。分水一淆。界址必多膠

轉。光緒八年改界。將此數山口割隸俄境。而分水界淆矣。

## 七 俄人侵略克爾根達什以上六牌博地

同治九年九月。中國塔爾巴哈臺立界大臣奎昌。會同俄國建立牌博大臣穆魯木策夫。各遵照同治三年圖約界綫建立牌博。其第一條云。自塔爾巴哈臺瑪呢圖勒幹卡倫起。往東南行至賽哩鄂拉。先往西南。後往西行。順塔爾巴哈臺山嶺至哈巴爾蘇地方止。此段共建牌博十處。第一處起即在瑪呢圖噶圖勒幹卡倫地方建立牌博一處。(一)次在哈爾塔爾地方。建立牌博一處。(二)沙爾布拉克地方。建立牌博一處。(三)沙爾托羅蓋地方。建立牌博一處。(四)察汗鄂博地方。建立牌博一處。(五)克爾根達什地方。建立牌博一處。(六)巴彥木爾占地方。

建立牌博一處。(七)庫哲滾大壩地方。建立牌博一處。(八)布凱阿蘇地方。建立牌博一處。共建立牌博十處。

此項界址。於光緒七年兩國會同修改。至光緒九年勘立界牌。自第六牌博(克爾根達什)以上凡六處牌博之地。悉割讓於俄。而塔爾巴哈臺之境壤日削。

## 八 俄人侵略巴爾魯克山外正西一帶地及巴爾魯

### 克山之久假不歸

一千八百八十三年。森提雅伯重月(俄九月)即中國光緒九年九月。俄人強援光緒七年改訂條約。重定塔爾巴哈臺西南一帶界址。其第四條云。

查從前巴爾魯克山內及塔屬各處駐牧俄屬哈薩克等。因為利己未

令中國官員管轄。亦未交稅。今議定此約。遂其巴爾魯克山及哈臺所屬地方。仍屬中國地方。卽令該哈薩克等遷移俄國之地。亦屬礙難。今換此約日起。其巴爾魯克山之哈薩克。予限十年。仍舊巴爾魯克山內游牧。俟限滿後。兩國官員如不另行商辦。則卽將該哈薩克遷任俄國地方。十年限內。中國官員將中國人民無庸遷住。巴爾魯克山內。亦無須設卡。除巴爾魯克山哈薩克外。其餘塔爾巴哈臺所屬各處駐牧哈薩克等。卽欲遷住俄國屬地方。亦屬礙難。今換此約日起。亦予限一年。其一年內。令將該哈薩克照舊原處游牧。俟限滿後。卽將該哈薩克遷移額米爾河迤南及巴爾魯克山內。或俄國所屬地方。

查同治三年舊界。巴爾魯克山之外正西一帶之平地。尙屬中國。所駐哈薩克人民。亦屬諸中國。今此約既直剖平地之半。歸入俄國。而俄人謂

山內所駐之哈薩克亦應屬俄。不得已爲此借地之舉。前數年借期已滿。譯署屢次催辦。俄人延宕不肯遷移。且俄官刊新圖。竟將巴爾魯克山嶺一半繪入俄國界綫之內。該處爲伊犁精河塔爾巴哈臺三城往來要地。乃光緒八年重訂伊犁界約。昏迷之下。終使地入於俄。至光緒七年約文。惟別珍島山口（卽霍爾果斯河發源處）之南。順霍爾果斯河。經過伊犁河。至廓里托特村東邊一帶。稍改舊界。自此以南。固明言順同治三年舊界之也。又其北轉東。雖未明言仍順舊界。但旣無改界之聲明。則仍順舊界可知。乃此約於廓里托特以南。竟背光緒七年改訂條約。不順同治三年舊界。而將舊界分水之格登山。割於俄屬。再南本以圖達喇河爲界。此約又改爲以蘇木拜河（松別河）爲界。俱與光緒七年原約不合。又北界各爾達板亦非舊界。自以客爾達板爲界。而塔屬巴爾魯克山外一帶。



之平地。勢不能盡爲中國所有。於是光緒九年之約。非但割平地之半隸俄。且有借地十年之案。

其巴爾魯克山外正西一帶地。自光緒九年割棄後。其所謂租借巴爾魯山地之事。迄十年限期已滿。始由巡撫陶模贖回。滿人視邊鄙爲禮物。可以隨時假借於人。俄人亦如王子繇看竹。何須問主人。直據其地。而毫無顧忌。

## 九 俄人侵略烏勒昆烏拉斯河等處

自肯德爾利克河源至哈巴爾阿蘇山口。爲同治九年所定界。屬於塔爾哈巴臺省。查同治九年所定。實自瑪呢圖喝爾勒幹始。後因光緒九年割去烏勒昆烏拉斯河以西一段。惟肯德爾利克河源至哈爾巴阿蘇尙

存其舊。然同治九年所定鄂博。係由俄國西伯利總管自行建立。請由中國科布多大臣奎昌查勘。與清使明誼所定紅綫有無侵佔。旋由奎昌咨報。與明誼界圖相符。事遂定。

## 十 俄人侵略伊犁河北岸一帶地

同治三年九月初七日。塔城記約第三條云。

自阿勒特布什山嶺東邊末處起。依阿拉套大嶺往西順阿勒坦特布什。索達巴哈。庫克托木。罕喀爾察蓋等山頂行向北。水流之處爲俄國地。向南水流之處爲中國地。至向東流水之薩爾巴克圖河向。西流水之庫克鄂羅木河。向南流水之奎屯河源之匡果羅鄂博山。卽轉往南。向西流水之庫克鄂羅木等河之處爲俄國地。向東流水之薩爾巴克

圖等河之處爲中國地。自此由奎屯河西邊之奎塔斯山頂行至圖爾根河。水從山內向南流出之處。卽順圖爾根河。依博羅胡吉爾奎屯。齊齊幹。霍爾果斯等處卡倫。至伊犁河之齊欽卡倫過伊犁河。往西南行至春濟卡倫。轉往東南。至特穆爾里克河源。轉東由特穆爾里克山頂行。圍繞哈薩克布魯特游牧之地。至格根河源。卽轉往西南格根等向西流水之處爲俄國地。溫都布拉克等向東流水之處爲中國地。自此往西南由喀喇套山頂行。至畢爾巴什山。卽順向南流水之達喇圖河。至特克斯河。過特克斯河。順邦林哈勒哈河。靠天山嶺爲界。自此往西南。分晰回子部落布魯特部落住牧之處。由特穆爾圖淖爾南邊山之罕騰格爾。薩瓦巴齊貢。古魯克喀克善等山。統曰天山之頂。行至葱嶺。靠浩罕界爲界。

此界約於光緒七年指明修改。至光緒八年十年間勘立界牌。薩爾巴克圖庫克鄂羅木兩河源以上。皆無所更改。更折而南。本順圖爾根河爲界。今順霍爾果斯河爲界。此伊犁河北岸一帶之地。本極膏腴。乃俄人借棲止屬回爲名。將地割去。中俄改訂條約第七條云。

伊犁西邊地方。應歸俄國管屬。以便因入俄籍而棄田地之民。在彼安置。中國伊犁地方。與俄國地方交界。自別珍島山順霍爾果斯河。至該河入伊犁河匯流處。再過伊犁河。往南至烏宗島山廓里扎特村東邊。自此處往南。順同治三年塔城界約所定舊界。此約經崇厚訂定。曾紀澤百計爭之。不能挽回。

十一 俄人侵略霍爾果斯河特克斯河及蘇木拜河喀爾達板等處

巴爾魯克山正西一帶地之損失。及巴爾魯克山地之久假不歸。揆其原因。實由達圖喇河改以蘇木拜河爲界等事。致其地勢不得不屬俄有。茲特將蘇木拜河喀爾達板及霍爾果斯河特克斯河格登山等處割去之約。詳錄左方。俾得悉知其顛末。事因光緒八年伊犁分界事。中國特派哈密幫辦大臣長順。會同俄國斜米里葉勒柯赫省（卽七河省）巡撫吉納爾魯諾伊什達布吉納喇勒瑪玉爾佛里德於光緒八年七月初三日。卽俄國一千八百八十二年阿瓦古斯塔月（俄八月）初四日。兩國分界大臣在伊犁西南天山之陰。繪圖立界。其約之第一條云。

自伊犁西南天山之陰那林哈勒喝山口中起。至伊犁東北喀爾達板止。此間共立界牌鄂博三十三處。兩國分界大臣會同在那林哈勒喝山口中建立第一處界牌鄂博。因山之中水往北流。以水東邊爲中國

地。以水西邊爲俄國地。從此出上口往東北。順水建立第二處界牌鄂博。又往東北。順水至草野。建立第三處界牌鄂博。從此往北行至草野。建立第四處界牌鄂博。從此往北行至諾海托勒蓋山。在其上建立第五處界牌鄂博。從此往北行至特克斯河（卽帖克斯川在伊犁河之南與伊犁河交匯灌輸在拖古思塔留地分七渠。渠如琴絃。其爲膏腴可知。前俄人借棲止屬回爲名。肆行侵奪。崇厚之約。已將該處全行讓去）之南沿。建立第六處界牌鄂博。自那林哈勒喝山口中至特克斯河之南沿。共立界牌鄂博六處。以界牌鄂博東邊爲中國地。西邊爲俄國地。從此過特克斯河。順河源往東北行至格登山口中所出蘇木拜河水。流入特克斯河之地方。以特克斯河之南沿爲中國地。北沿爲俄國地。自蘇木拜水流入地方。逆流往北行至格登山口中蘇木拜地方。

建立第七處界牌鄂博。山中所出之水。往南流入特克斯河。以水之東  
 沿爲中國地。西沿爲俄國地。從此東北行至沙爾套山之西南。處建  
 立第八處界牌鄂博。（自第八界牌鄂博以北。卽割棄格登山巔之地。）  
 從此往東北行至沙爾套山梁爲交界。以山之東南爲中國地。以山之  
 西北爲俄國地。順沙爾套山梁往東北行至山斷處。地名康喀。其水往  
 東南而流。在水之西沿山斷處建立第九處界牌鄂博。在東沿建立第  
 十處界牌鄂博。以此界牌鄂博之東南山水爲中國地。西北爲俄國地。  
 從此往東北順山梁行至喀爾套山之達巴罕。建立第十一處界牌鄂  
 博。至第十一處界牌鄂博止。以山之東南爲中國地。以西北爲俄國地。  
 從此往西北。順山梁行至西高處。建立第十三處界牌鄂博。從此西北  
 （疑有誤）順山梁行至山高處。建立第十四處界牌鄂博。從此往西北

順山梁行至山高處。建立第十五處界牌鄂博。從此西北行至沙爾諾海小山之橫路北邊山上。建立第十六處界牌鄂博。自哈爾套山之達巴罕至沙爾諾海小山。共立界牌鄂博六處。以界牌鄂博之東邊爲中國地。西邊爲俄國地。從此往北走過沙爾諾海大山之達巴罕。行至山陰。往東北略行。卽在沙爾諾海別德圖二水中間之小山斷處。建立第十七處界牌鄂博。以小山之東邊由沙爾諾海山谷流出之水入於橫海之處爲中國地。以小山之西邊別德圖水爲俄國地。從此往西北行至葛爾扎特村（卽七年條約之廓爾扎特）之東邊。瑪雅村之西邊。兩村中間在特奇勒干小山。建立第十八處界牌鄂博。從此往西北行至伊犁河南沿霍爾果斯河水流入之處。此間草野之地。建立第十九、第二十、第二十一、第二十二、第二十三、第二十四、第二十五等處界牌鄂



博。自沙爾諾海山之北邊。建立第十七處界牌鄂博。至伊犁河南。建立第二十五處界牌鄂博。止。共立界牌鄂博九處。以界牌鄂博之東邊爲中國地。西邊爲俄國地。從此過伊犁河。自北沿至霍爾果斯河。逆河往北行入霍爾果斯河之山口。至河源。又往北行至別珍套山。又往西灣至康略達巴罕。建立第二十六處界牌鄂博。此間以河及河源爲交界。以霍爾果斯河之東邊爲中國地。西邊爲俄國地。從此往西行。又往西北行。順別珍套山梁。自空郭羅鄂博往西北行至庫克烏蘇山。建立第二十七處界牌鄂博。從此往西行至庫克烏蘇山之平高德木克達板上。建立第二十八處界牌鄂博。自第二十六處界牌鄂博。至第二十八處界牌鄂博止。以界牌鄂博之東邊北邊爲中國地。西邊南邊爲俄國地。從此往東略北而行。靠阿拉套山之達巴罕至薩爾坎斯克山中。

庫托木索達板。喀爾達板等處。建立第二十九、第三十、第三十一、第三十二、第三十三、南牌鄂博。共立界牌鄂博五處。以阿拉套山之達巴罕爲交界。以山之東南爲中國地。山之西北爲俄國地。

又第二條云。

霍爾果斯河源流出之水。在霍爾果斯河之東西兩沿居住民人等。願將河水灌地者。任其灌地。卽作兩國公水。彼此不准爭競。以資各滅得其地利。至霍爾果斯河中有洲之處。卽作兩國公地。兩國人民不准在洲蓋房種地。將此載入條約。永以爲例。

攷特克斯河。又名帖克斯川。崇厚曾全行割與俄人。上游之木順圖爾根河者。俄人東占。至霍爾果斯河。其原因則爲俄羅斯政府之蓄謀侵略中亞細亞。遂與伊犁生交涉。時有約克勃可汗者。浩罕汗張格爾之子也。

欲廢其子而自領其衆。遂略取喀什噶爾。併吞天山南路地。清廷乃命陝甘總督左宗棠統兵進討。約克勃汗一時未平。俄國政府以騷擾伊犁爲名出兵。於同治十年占領曲城。清廷未省。至光緒三年約克勃汗死。清軍全平天山南路。轉兵向天山北路。北路卽伊犁也。時俄軍已占據之。左宗棠請交涉命之退。不應。清廷於光緒四年遣崇厚使俄。崇厚昏聩妄結條約。以伊犁一部分之曲城還中國。而帖克斯河等地仍由俄占守之。且索償占守費五百萬盧布。時物議大譁。清廷乃廢此約。遣曾紀澤使俄。（光緒七年）訂新約如左。

- （一）中俄二國之境界。從白奇脫嶺沿霍爾果斯河。自此河而進。至注入伊犁河之處。更進而至橫斷伊犁河而達於南方之烏森脫嶺。
- （二）中國償還俄國自一千八百七十一年以來占領伊犁之費用九

百萬盧布。

(三)俄國於中國各地得有設置領事之權。且俄國人民於伊犁得有土地權。與各種貿易上所有特權。

據此條約。帖克斯河下游緊要。東南岸雖由曾紀澤爭回。而霍爾果斯河兩岸已割隸於俄。曾紀澤之意。惟以爭回帖克斯河之東南爲計。謂該河上可通拱震諸城。與伊犁喀什噶爾相聯絡。可以進戰退守。天山南北之要隘。未有勝於此者。蓋自畫分霍爾果斯河屬之俄人。而五百里之卡屯已棄如敝屣。畫分特克斯河屬之俄人。而銅鐵名產皆分於俄矣。特克斯河橫亘天山以北。阻隔庫車科城之聲氣。而塔爾巴哈臺距伊犁千里以外。亦有畫歸俄屬者矣。要之。俄而得帖克斯河。則伊犁與喀什噶爾。不難盡歸其版宇。從此下則庫車拜城以西。上則惠遠綏定以東。皆將因之。

而勢成破竹。

## 十二 俄人侵略阿勒坦特布什山等處

同治三年九月初七日。清國勘辦西北界務大臣明誼等。會同俄國大臣雜哈勞。在塔城議定記約十條。其第二條云。

自瑪呢圖勒幹卡倫起。往東南行至賽里鄂拉。先往西南。遂往西行。順塔爾巴哈臺山嶺。至哈木爾達巴哈。卽轉往西南。順庫木爾。齊哈喇布拉克。巴克圖（在塔城西七十里）葦塘子。呢瑪圖。沙喇布拉克等處。卡倫之路。至巴爾魯克。阿拉套兩山嶺中間。由平拉行。卽在哈布塔蓋。阿魯沁達蘭兩卡倫中間。擇山坡定界。自此至阿勒坦特布什山嶺東邊末處爲界。此間分別兩國交界。卽以水流爲憑。向東向南水流之處爲

中國地。向西向北水流之處爲俄國地。

此約界務曾於光緒七年指明修改。至光緒九年勘立界牌。中俄塔爾巴哈臺界約第一條云。

今自伊犁東北塔爾巴哈臺西南之喀拉達板地方。所立舊界牌鄂博。在何處建立之處。逐一開明。分界辦法。自喀拉達板起。（伊犁交界）至土斯賽溝口。從此東南行至該溝頭。卽建立俄國三十四處界牌鄂博。從此行至郎庫勒之野高阜庫庫阿得爾庫都克地方。建立第三十五處界牌鄂博。（二）從郎庫勒之野西北行至英敦巴爾魯克舊卡倫。就此兩間之庫夏奇等溝口對面。建立第三十六處界牌鄂博。（三）從此行至沙拉阿喝奇達等名溝口對面。立第三十七處界牌鄂博。（四）以托婁勒山之南嘴。建立第三十八處界牌鄂博。（五）就此山之西邊。

建立第三十九處界牌鄂博。(六)莫敦巴爾魯克舊卡倫地方。建立第  
 四十處界牌鄂博。(七)從此順中國舊卡倫之路行至巴爾魯克舊卡  
 倫地方。建立第四十一界牌鄂博。(八)額爾格斯塔素土舊卡倫地方。  
 建立第四十二處界牌鄂博。(九)察罕托海舊卡倫地方。建立第四十  
 三處界牌鄂博。(十)沙拉布拉克舊卡倫地方。建立第四十四處界牌  
 鄂博。(十一)瑪呢土舊卡倫地方。建立第四十五處界牌鄂博。(十二)  
 從此順卡倫之路。行至葦塘子舊卡倫。有伊尙纏頭之樹木園子。此園  
 以爲交界之西。其烏松阿哈奇泉子地方。建立第四十六處界牌鄂博。  
 (十三)克吉爾拜泉子地方。建立第四十七處界牌鄂博。(十四)葦塘  
 子舊卡倫地方。建立第四十八處界牌鄂博。(十五)從此順卡倫之路。  
 行至喀拉布拉克巴克圖舊卡倫地方。建立第四十九處界牌鄂博。

(十六)從此順卡倫之路。行至奇塔特河水由山口流出地方。此處有烏松布拉克之路。附近地方。建立第五十處界牌鄂博。(十七)由塔城往索瓦索達巴罕之路。附近地方。建立第五十一處界牌鄂博。(十八)喀拉奇塔特河。從塔爾巴哈台中流出地方。建立第五十二處界牌鄂博。(十九)從此喀拉奇塔特河。逆流行至庫木爾奇舊卡倫地方。建立第五十三處界牌鄂博。(二十)從喀拉奇塔特逆流行至布爾罕布拉克河匯流之處。從此以布爾罕布拉克逆流行至河源。建立第五十四處界牌鄂博。(原注)即中國塔界第二十一牌博。從此卡倫之路行至哈巴爾素達巴罕直靠舊界。自塔屬喀拉達巴罕起哈巴爾阿素達巴罕止。共立牌博二十一處。其所立牌博。繕寫滿漢俄三樣字。就此所立牌博之處。以爲交界。並將所繪輿圖內紅綠亦爲兩國交界。今



將兩國所定之界。自塔西南喀拉達巴罕起。迤北至哈巴爾阿素達巴罕。其界線西北爲俄國地方。界線東南爲中國地方。並將輿圖內所畫紅線。迤東爲中國地。迤西爲俄國地。其所立牌博數目。及所有輿區內山河以及地方。均按此約議定章程辦理。

此界首自伊犁交界之喀拉達巴罕起。已非同治三年之舊界。則光緒八年九月伊塔界約。已割舊界之阿勒坦特布什山屬俄瑪呢圖噶圖勒幹卡迤南。固順新界割去。卽哈布塔蓋。阿魯沁達蘭。兩卡中間平地。亦有更改。故阿勒坦特布什山亦盡歸俄屬。不復以東邊末處爲界矣。故自喀拉達巴罕往東至耶庫勒之野。順此平地往北定界。至莫敦巴爾魯克卡。始會於同治三年之舊界。

### 十三 俄人侵略納林廓勒圖永等處

塔爾巴哈臺附近。自納林廓勒至圖永之界。爲光緒八年及十年所定。其與同治三年舊界合否。世無論者。細讀同治三年舊約。又查明誼所定界圖。知此界之失地爲不少。同治三年約第三條云。

過那林哈勒哈河（卽納林廓勒水）靠天山爲界。自此往西南。分晰回子部落布魯特部落住牧之處。由特穆爾圖淖爾南邊之騰罕格爾薩瓦巴齊眞。古魯克喀克善等山。統曰天山之頂。行至葱嶺。靠浩罕界爲界。

按既曰天山之頂。必指自天山至葱嶺之正幹而言。斷非天山西南之支阜可知。既爲天山至葱嶺之正幹。則凡正幹以南流入中國之水。皆應屬之中國可知。則此界之渡阿克蘇爾。渡扎那河特河。渡阿克賽河。是各水發源之地。皆劃在界外而歸俄。查明誼界圖諸水源。均包在界內。是知

同治三年實以天山正幹爲界。約略其大勢。當自汗騰格里山巔西迤至納林廓勒山口。卽循貼列克山（卽滿清聖武記所言之鐵列克嶺有路可以南通喀什噶爾）脊。亦卽善塔斯嶺西偏北二度迤二百五十里。又西偏南二十七度迤一百六十里。皆貼列克山。山北之水。皆入特穆爾圖淖爾。山南之水。皆入扎那爾特河。又轉而南偏東十二度迤一百又四里。又轉東偏南三十七度迤四十八里。至別牒里山口。自貼列克山至此。卽庫庫爾特留克山。山西之水。皆入納林河。山東之水。皆入扎那爾特河。復轉循廓克沙里嶺（卽喀克善山）西偏南四十三度三十分迤一百又六里。（此一向卽光緒十年所定界。）又轉西偏北二十二度迤一百里。循阿特巴什山西偏北三度迤一百又五里。又西偏南二十五度迤二百三十四里。至圖永阿特巴什。山北之水。均入納林河。山南之水。均入阿克賽

河。此天山正幹與葱嶺相接者。同治三年明誼所議。卽以此爲界。後之議者。不辨山之餘支。水之方向。又不細察明誼舊圖。貿然從事。無端割去數十百里之領土。仍不自知。強鄰旣得地。且反唇議清人之愚。可哀也已。

#### 十四 俄人侵略齋桑淖爾以東以南之地

光緒七年時清廷特派使俄國全權大臣一等毅勇侯。大理寺少卿。曾紀澤。俄國特派參政大臣。署理總管。外部大臣。格爾斯。參議大臣。出使中國全權大臣布策。改訂條約。其第八條云。

同治三年塔城界約所定齋桑湖迤東之界。查有不安之處。應由兩國特派大臣會同勘改。以歸妥洽。並將兩國所屬之哈薩克分別清楚。至分界辦法。應自奎峒山（卽奎屯）過黑伊爾特什河（卽喀喇喀爾

齊斯河) 至薩烏爾嶺 (即薩烏魯) 畫一直線。由分界大臣就此直線與舊界之間酌定新界。

此一段爲光緒九年科布多界約。與阿拉克別克河口約所本。齋桑淖爾以東以南之地割去不少。觀察光緒九年科布多界約自得明。其第一條云。

查今一千八百六十四年 (即同治三年。此約稿本出俄人之手。故以西曆紀年。凡換約稿本出於俄人乎定者。十之九) 在塔城議定。自大阿勒泰山嶺起。至賽哩烏蘭止。應將舊約更改。現在兩國所立新界。自賽哩烏蘭嶺之木斯烏山西脚起。至烏勒崑烏拉斯圖河源。循此河至邁哈布奇蓋地方。名依森克拉得墳。由此直循喀喇額爾濟斯河而行。入阿拉克別克河之額爾濟斯河口上十里。歸額爾濟斯河灣南首。由

此循喀喇額爾濟斯河。至阿拉克別克河口。即過爾濟斯河循阿拉克別克上游出山。沿額奇克阿蘇阿雅噶荒地而流至左右之阿克塔斯河口。從此轉東。直過克森阿什奇克眞山梁。由博勒哲克河左至博勒哲克畢爾愛拉克巴什河口。循博勒哲克之畢爾愛拉克巴什河上游而行。直出薩斯山灣。至該河之源。由此直至阿克哈巴喀拉哈巴兩河交會之處。循阿克哈巴河上游而行。至大阿勒泰山嶺來源。自此即歸同治三年塔城舊界。其木斯島山以西。及阿克哈巴河源。以東舊定邊界。應仍其舊。毋庸更改。至其間因分別規定兩國邊界。即將議定邊界附入條約。以圖上紅線道。作爲交會線道。以東以東南之地均歸中國所屬。線道以西以西北地方皆爲俄國之地。兩國邊界既已議定。不得再議更改。

此條文。卽割去齋桑淖爾東南境土約中之要點。又查沙刺布拉克卡倫轉南八十四里爲肯德爾利克河源。肯德爾利克。卽水道記之鏗額爾西北流入齋桑泊之水。亦卽康熙中征西將軍祁里德勤厄魯特地。自阿克喀巴河源至此。爲塔約所定之界。攷乾嘉舊界。實在齋桑泊之西北。水道記云。哈爾巴哈河西罕巴爾度夏處布崑河西庫庫岱度夏處。庫庫岱者。右部哈薩克玉阿訶勒必斯第六子。乾隆五十五年授公爵。罕巴爾者。西部哈薩克臺吉薩呢雅斯第四子。嘉慶五年以捕賊功。授五品秩。按哈爾巴哈河。卽新圖之喀圖布憂河。在齋桑泊之西南。布崑河卽新圖之布寬河。在齋桑泊之西北。兩河皆在塔約界外。實當年中國藩封故壖。水道記又云。額爾齊斯河既會布崑北流。經扎哈哈淖爾淖。淖爾。布崑河北岸百里。扎哈蘇二淖爾。皆周數十里。南北相去是許。兩淖爾間置卡

倫。淖爾東北八十里。爲輝邁拉呼卡倫。卡倫臨河西岸。其東岸爲那瑪嶺。嶺道崎嶇。扳援乃能上。每歲夏塔爾巴哈臺置輝邁拉呼卡倫於河西。科布多置霍尼邁拉輝卡倫於嶺間臨河。以譏禁俄羅斯之通商者。理藩院事例云。俄羅斯等除在恰克圖交易外。霍尼邁拉輝卡倫不准通商。按那瑪嶺卽新圖之那雷穆嶺。札哈蘇淖爾求之新圖。不可復見。以地望準之。霍尼邁拉輝卡倫。當在那雷穆嶺西麓。臨額爾齊斯河處。喀勒賓嶺之南。〔喀勒賓嶺。胡圖作哈爾巴阿林。西域圖志作喀爾滿達巴。〕由是而乾嘉舊界可得而指認。霍尼邁拉輝。旣與恰克圖並稱爲不准通商處所。當時必視爲重地。曾幾何時。已爲俄人所有。中國官吏無過問者。俟塔城議約。則已早在界外。而光緒九年修改之約。較之塔約喪地尤多云。

## 十五 俄人侵略哈薩克夏季游牧地



一千八百八十一年伊約里月（俄國七月）中俄科布多界之約第二條云。

查闊濟木博特鄂陀克之哈薩克。從前爲中國所屬。今此項哈薩克冬夏游牧之地。於此次定界後。皆分入俄國。該哈薩克等應自換約之日起。予限一年。或願仍居原處爲俄國之民。或願移入中國爲中國之民。外。其楚巴爾愛格哈。真特式兩鄂陀克之哈薩克等。按今所定之界。冬牧爲中國屬地。而夏牧分入俄國。該哈薩克等亦應一律予限一年。或願如闊濟木博特鄂陀克之哈薩克等爲俄國之民。或移入中國爲中國之民。並闊濟木博特鄂陀克之哈薩克內。或有冬牧爲中國屬地。而夏牧分入俄國屬地者。亦因一律聽其所願。現地約既已議定。其兩邊願移人等。遷移事宜。及所屬新地。指爲伊等冬夏游牧之地。應自換約

之日起。予限一年。將往居新地事宜。責成兩國邊界官辦理。斷不得逾限越界遷移。

此項哈薩克夏季游牧地割讓之約之訂明。其不割取冬季游牧地。而獨取夏季游牧地者。緣夏季水草必豐。牛羊不壯。知突厥之將亡。草長馬肥。識匈奴之必至。極邊風尚。由來久矣。查哈薩克即古之陽關。本回部之大者。漢爲康居國。地分三部。左部曰鄂爾圖玉斯。在伊犁之西北。右二部亦稱中部。西部。中部曰齊齊玉斯。西部曰烏拉玉斯。皆在伊犁之正西。乾隆二十年。準部底定。河陸爾撤納叛逃。左部誘其汗河布賚合兵拒戰。清兵擊破之。左部遂降。中西兩部亦詣軍間納款。皆授王公臺吉世爵。三年一貢歲一市。以馬羊易緞布。而稅其百一。其右二部之北。別有一部曰北哈薩克。昔時侵掠俄羅斯邊境。俄人設兵防之。至光緒三十一年。塔爾巴

哈臺辦事大臣安成。具摺奏稱。

塔爾巴哈臺中俄交界勘定之後。哈薩克各部落雖已歸化俄境。然各酋長不忘朝廷舊恩。依然歸順我國。今據柯勒依部落長稟。援伊犁黑牢部落之列。自願報効。獻納租馬。該部落長現在巴爾魯克山牧馬。共有八千餘匹。其他中俄交界之各部落酋長。亦均自願報効。獻納馬匹。今以牧百納一計之。每年約可得馬五百匹。撥爲騎兵應用。裨益誠非淺鮮。故於本年二月委員前往柯勒依部落抽收租馬。惟念各該部酋長情殷報効。志殊可嘉。應如何獎勵之處。請飭核議訓諭遵行。

## 十六 俄人侵略瑪里他巴霍斯庫魯克等處

霍斯庫魯克者。 (卽和什庫珠克) 於乾隆二十四年閏六月十五日

因回人爲亂。由滿將明瑞率兵追回。霍集占兄弟至此。在此大戰。於是大軍出塞。宣揚國威。赫赫武功。口碑載道。此次戰後。霍集占兄弟南奔。於是有阿爾楚爾之戰。有伊爾洱庫爾淖爾之戰。均有所謂御製詩。伊西弭之戰。并有勒銘之所謂御製碑。卽當日盛傳之所謂帕米爾御碑也。詎霍斯庫魯克之地。竟於光緒八年割去。查光緒十年喀什噶爾西北界約第三條云。

分界大臣自伊爾克什坦自然界往南至烏自別里山豁止。勘分兩國末段邊界。其界順嶺過山嶺極高峻。而靠此嶺。尙有地方。亦稱極高。兩國應輪往查察。除無路可通。人跡難到之處。該處並無緊要地方。毋庸建立界牌外。今日伊爾克什坦自然界往南。順瑪里他巴爾河作界。河之左岸歸俄國屬轄。河之右岸歸中國屬轄。再自此河上游起。順山嶺

往南。至瑪里他巴爾山止。自此再順此嶺之岔。往烏赤別里山。過瑪爾堪蘇河。順喀喇庫里湖東之大嶺。過此嶺之喀里他達灣山。此山豁一年之內積雪半年。再順山嶺過不能到之喀喇維克山。豁。至烏仔別里山。此山豁亦半年積雪。兩國界線至此山豁爲止。俄國界線轉向西南。中國界線一直往南。所有界線以西。及順該處河流之西。歸俄國屬轄。其界線以東。及順該處河流之東。歸中國屬轄。

當光緒七年議約時。俄羅斯卽以南界當止於瑪里他山。巴山口爲請。因叛華之回酋阿古伯夙許俄人南至瑪里他山。巴山口也。曾紀澤不許。謂里發底亞約（卽崇厚所定之約）內所未有之地。斷不能有所增加。俄人亦遂無詞。迨光緒八年勘界時。俄人乘清人不覺。非但南至瑪里他山。並由瑪里他山更直引向南二百餘里。以烏仔別里山口爲南界。而霍斯

庫魯克之地。察提爾庫里阿特巴什山一帶。亦無形中劃入俄疆。

## 十七 俄人侵略伊西洱庫爾

中國收復新疆時。邊臣劉錦棠即展設邊外七卡。十五年又添設蘇滿一卡。於伊西洱庫爾（即雅什里庫里）北十里之地。是處有清高宗之所謂御製平定回部勒銘伊西洱庫爾淖爾之碑。夫既有所謂御碑者在。誠如碑史之所謂有詩爲證。我疆我里。誰敢奪之。乃俄人竟要求退蘇滿之華軍。新疆巡撫謂建立御碑之地。必爲界內之地。開兩國之談判。與之力爭。詎知光緒十年滿員沙克都林札布與俄國定約。蘇滿卡地已劃於綫外。勢不能復爲中國有。而帕米爾之界蹙。所謂祖宗之御碑。宣威沙漠而馳譽丹青者。亦等於岫嶽禹碑。孤峙於境界之外而入俄人之手。後人

有遊俄疆而履其地者。猶見此清廷祖宗御製之碑。風霜剝蝕。苔蘚交侵。而其文猶可辨也。文曰。

機有苦先而反得。智者之所勦。而愚者之所惑也。事有初勞而終逸。壯者之所劬。而懦者之所怯也。若夫定全回。殲二酋。戰無不克。攻無不取。皆二將軍諸參贊以及行間衆將士之力也。然予亦有深慰於其間者。則以五年劬劬。宵旰運籌。押至。實未敢偷安於頃刻也。幸我武保定。庶因答乾貺。慰先志。且以免浮議之指斥也。伊西洱庫爾。淖爾者。我副將軍茂德等窮追二酋至拔達克山之界。獲其降者萬人。二酋僅以身免。而遣使索俘。遂得獻馘。振旅以成茂勩也。其地倚山臨水。單騎可容。而我突將無前。四甄並發。如入無人之域也。衆賊首尾不能相顧。豎我回纥以招之。降者鋪塵而來。霍集占持刃止之。或且反戈倒載也。是以二

酋見事不成。拔身遠跳。蹶突而啄息也。先是蹙之於霍斯庫魯克。襲之於阿爾楚爾。無不以少勝衆。批亢搗堅。桓桓之士。眞如驅虎豹而逐狸兔。纏頭碩鼻者。流皆震駭。懼伏。見卽辟易也。是以先聲異域。駭其跳蕩。遮逆助順。用攫重輜而獻兇級也。我兵未深入拔達克山境者。則以討逆之師。不蹂無罪之地。姑遣師焉。彼或曉順逆。亦將禽獻。是以將帥之臣。審機度時。我武少戢也。率歲事而告成功。則亦未爲計之先也。回部始末。已見於勒銘葉爾奇木之碑。辭不複綴也。特紀耆定之在茲。是以誌歲月而刻石也。

## 十八 俄人侵略帕米爾大地之一部分

帕米爾高原（又稱巴馬）相傳爲人種發生之地。葱嶺巔之一大平



原也。乾竺時諸回部分據之。其區域東界英吉沙爾。東北鄰喀什噶爾。南界英屬之克什米爾。東南接葉爾羌。西北連俄屬之費爾干。（即浩罕故墟）印度在其南。阿富汗在其西南。誠古人所謂華離之域。而英俄中三國分界之甌脫要區也。占據帕米爾則包裹新疆之西。有高屋建瓴之勢。故俄人將華領帕米爾之地潛行占據。其時因新疆有亂事。以故清廷不知。迨一千八百七十七年（光緒三年）中國新疆軍務大臣左宗棠統率湘軍經略新疆。進攻天山南路。陷葉耳羌。新疆既已恢復。始知帕米爾境爲俄人所蠶食。遂遣戍兵於帕米爾邊疆。以期固我藩籬。當中俄界務糾紛之際。左宗棠部下之兵自葉爾羌等處進至崑崙高原。入西利喀爾之澗谷。以遙制俄人之侵畧。又阿富汗之戍兵亦進帕米爾西麓。占領盧西庵。秀南。及瓦崗地方。此自一千八百七十九年至一千八百八十一年。

事也。一千八百八十一年俄國陸軍提督歐羅夫氏率騎兵千人自馬耳  
 棋廊向東南進發。至北緯三七度東緯七五度之端。查看後。乃於亞克史  
 河上流築一要塞。戍以屯兵。即所謂孟魯家皮誠塞是也。當此之前。自一  
 千八百七十二年迄一千八百七十三年。英俄兩國間。互商數次。始允  
 以帕米爾之大半入俄版圖。此次議定之約。即所謂南魏爾協商是。當  
 時英國外務官南魏爾氏不審帕米爾之形勢。不計將來之關繫。舉帕  
 米爾以北之地。悉以與俄。遺誤誠非淺鮮。一千八百八十九年。俄國陸軍  
 提督辜盧姆鳩史喀率查探兵隊深入帕米爾高原。至梯持拏地方。與英  
 軍前哨衝突。然尙未起大衅。翌年俄提督歐羅夫氏復率部下騎兵入帕  
 米爾。巡視高原。偶與英國中左容古漢史旁相邂逅。俄軍強加不禮之事。  
 致召英憤怒。俄帝陽雖歸罪於歐氏。陰則與以厚賞。一千八百九十三年

年歐羅夫氏復率兵入帕米爾高原。與阿富汗小兵隊相衝突。發槍互擊。阿兵死者十五人。知勢不敵而走。於是俄阿之紛議頓起。後一千八百九十五年英俄二國各遣委員勘定帕米爾地界。遂於是年三月互訂條約。而英俄之勢力疆域始定焉。然其時於帕米爾之中俄疆域。在帕米爾現今所占之區域。俄國尙未劃定。惟據一千八百九十四年中俄協議。有對中國不敢干涉之語而已。沿俄領之帕米爾南端居英領俄領之間而隔斷一二國領地者曰瓦岡州。瓦岡州之幅員廣不下二十英里。故現在俄領之形勢。未至直接印度而俯瞰英領。至於俄阿疆界數十里之間。前後更革不下數次。凡所更革。俄人爲所欲爲。他國不能參議。今所謂界綫。起至一千八百八十五年之帕米爾條約。東自與中國鄰接處至魏克特那湖。至是而近阿克斯河上流謂之西方界綫。一千八百八十七年。勘查阿

富汗疆界委員立柱至九十七。以爲劃界標識。一千八百七十二年據南魏爾條約所決議。則自阿克斯河之茲耳希加峽近處至哈里拉特河（阿富汗與波斯接壤）而止。此條約決議與一千八百八十七年所勘查者無異。其後因帕界紛爭。英俄中國各遣委員勘界。光緒十九年歸安錢氏曾譔分界私議。譯署卽據以與外人開議。雖其後未能爭回領土。然界址地名。自清廷開示。實前此所未有之事。其所議略如左。

查帕米爾連山攢聚。非順其山勢。不能定界。非有確指定某山某水。不能開議。西人於邊隘要區。最重分水界。取其彼此易守而難越。分水界者。論其大勢。山形南北。則水分東西。山形東西。則水分南北。論其細情。水出山中。其旁必可通路。溯流覓路。可登山頂。兩坡相同。此山頂有路處。卽所謂分水界也。烏仔別里以南。因都庫什以北。薩雷

闊勒以西。其間山勢一縱四橫。帕米爾山形東西行。凡分四行。和什庫珠克帕米爾與薩雷茲帕未爾相隔者爲第一行。薩雷茲帕米爾與阿爾楚爾帕米爾相隔者爲第二行。阿爾楚爾帕米爾與大帕米爾相隔者爲第三行。大帕米爾與小帕米爾相隔者爲第四行。再南卽因都庫什。迤東附近薩雷闊勒之山名赫色勒牙克者。南北行。此南北行者爲東西大分界。（尼若塔什山口以北如楚什蕭山口木司庫魯山口等皆是。或謂此名尼若塔什山。而赫色勒牙克山又在其東。說恐未確。緣東西大分界向皆屬之赫色勒牙山也）俄人以就分水界定界爲辭。蓋以帕中山強東西行。不便於南北直分。必繞出帕東始有分水界。是顯與約語不同。其狡猾之思已可概見。將欲折其狡謀。則莫如就帕中小分水界約略示以一綫爲勘界張本。不背約意。而又合於分水

之說。其綫自烏仔別里引長。由南稍西。以阿克拜塔河源之阿克拜塔山口。再南之卑來烏提山口。再南之帕沙脫山口爲界。其水向東流。耶庫里帕米爾屬中國。水向西流之薩雷茲帕米爾屬俄國。再南過穆爾格阿布河。順喀喇蘇河。再南至尼赤塔什山口爲界。水向東流入阿克蘇河者。爲阿克塔什平地屬中國。水向西流入雅什里庫里者。爲阿爾楚爾帕米爾屬俄國。再南至薩雷庫里。居大帕米爾之中。此處平地約闊四英里。(連湖面在內)勢稍平坦。分水界頗不易覓。同治十二年英人托爾在此覓得湖東十二英里之處。高於海面一萬四千三百二十尺。有北來一水。分爲兩岔。一岔西流入湖。一岔東流成伊什提克河。定爲分水界。從此東北八英里地名沙哈土巴。平地漸窄。有歧路北通阿帕。南通小帕。最爲險要之地。水向東北流之大帕米爾東半屬中國。水

向西流入薩雷庫里之大帕米爾。西半屬俄。自此以南。卽與阿富汗所屬之瓦罕帕米爾相連。(中畧)雷薩庫里東南爲小帕米爾。英人皆謂此地斷不可歸於俄人。地在因都庫什以北。旣不能歸入印度。在薩雷庫里以東。又不能歸入阿富汗。應入中國無疑。故自鄂依庫里以東。水東流爲阿克蘇之小帕米爾屬中國。自布才拱巴什以西。水西流爲瓦罕蘇之瓦罕帕米爾。仍屬阿富汗。再南爲塔克敦巴什帕米爾。此平地與薩雷闊勒平地相連。(薩雷闊勒者波斯語高地。塔克敦巴什者同語高地。此一地相連之證。)此地。在坎巨提部以北。坎部旣爲中英所共屬。則坎部以北之地。應屬中國無疑。故自瓦呼羅特山口渾楚鄂帕山口以東。東流之水屬中國。明塔曼山口以南。(已出帕米爾)南流之水屬坎巨提。如此則中俄阿分帕。中國共得三帕半。(卽庫里帕米爾

小帕米爾。塔克敦巴什帕米爾。及大帕米爾之半。俄國除和什庫珠克帕米爾外。又得兩帕半。即薩雷茲帕米爾。阿爾楚爾帕米爾。及大帕米爾之半。阿富汗仍得一帕。瓦罕帕米爾。下略。

光緒十七年夏。俄兵大隊游弋帕米爾地方。並揚言各帕米爾均應歸俄國管屬。先是中國收復新疆。劉錦棠展設邊外七卡。已詳第十四節。十五年又添設蘇滿一卡於伊西洱庫爾。即雅什里庫里。又十里之地。派兵多名駐於蘇滿。自俄兵游帕。欲清廷撤退蘇滿之兵。新疆巡撫以伊西回庫爾北十里之地有清帝御碑在焉。馳告譯署。與俄力爭。惟光緒十年清廷大臣沙克都林札布與俄定約。已載明兩國界綫至烏仔別里山豁爲止。業將霍斯庫魯克等處割棄。俄國界綫轉向西南。中國界綫一直往南。若按此約而論。自烏仔別里山口作一直綫。引長往南。以爲



界綫。則蘇滿一卡遠在綫外。不能復爲中國所有。惟有堅持喀約。照南北經度直綫劃界。在中國尙可得帕米爾之小半。故譯署根據喀約與俄議界。但俄人數稱喀約不足據。且謂混舉喀約。不有實指之某水某山之分水界。何能議界。蓋以爲中國必不能舉地名以相爭。歸安錢氏聞之。卽作帕米爾分界私議。送之譯署。旋卽據以與俄爭。亦可謂清廷官吏中之庸中佼佼者。乃此帕米爾之紛爭。中國英俄各遣員勘界。而瓦罕以南。悉入於俄。瓦罕以南。悉入於英。瓦罕以東。則歸中國。據薛福成與總理衙門書云。瓦罕帕米爾。英亦有願歸中國之意。又云。帕米爾事。初因英外部沙侯出遊未回。是以稍緩開談。帕部舊係中屬。英旣送圖於前。俄亦撤兵於後。在彼兩國皆不能有侵占之證據。今中國旣願推而勿有。與兩國共之。論理當無窒礙。云云。以如此形勝之區。人方百計以求之。清廷乃垂手而棄。

之。是中國近數十年來。西陲一隅。失地竟達百萬方里以上。抑又聞之。帕米爾山勢迴環。其脈發自葱嶺。實爲大地最峻之脊。從前隸中國疆圉。羈縻勿絕者十居八九。自英俄紛爭環伺。迤北迤西歸屬於俄。迤南小部則附於英屬之阿富汗。邊疆蹙削。藩籬盡撤。倘今再不開發新疆。於邊境多建行省。以屯殖爲增富實邊之謀。恐人將先我而圖之矣。國人其猛省之。

## 十九 俄人侵略尼布楚及額爾右納河右岸之地

尼布楚本古烏洛俟國境。烏洛俟。在古時爲俄國屬地。然則尼布楚今爲俄有。當係物歸故主。但自俄國言之。則爲光復舊物。自我中國言之。則爲割棄領土。蓋其地當元代爲蒙古所併。故輾轉而屬於中國。又展專而屬於俄。茲試詳言俄人割取尼布楚之原因。（上文雖已畧言之。茲再詳述經過。）明代萬曆間。俄帝米楷爾三世遣哥薩克兵經略東方。一千六

百四十三年。俄國雅克德斯克將軍兀魯尹命波雅爾古侵略黑龍江。崇禎十六年後。乃沿黑龍江漸侵略滿州北部。波雅爾古率兵一隊下黑龍江。出鄂和達海。閱三年。共歷七千餘英里而歸。是爲俄羅斯人侵占黑龍江城之始。時有哈巴羅夫者。聞波氏探險之報告。知達瑚爾（卽打虎兒。又稱達瑚里或達瑚爾又名打狐狸）地方之富饒。因請於俄帝。出征黑龍江一帶。俄帝賜以糧食皮服等。時一千六百四十九年。卽清之順治六年也。翌年。俄人派兵百名。直下黑龍江。於城濱望見有城池三座。皆寂無人跡。哈巴羅夫遂詐誘索倫族酋長曰。俄人之來此。非有他意。不過欲徵皮毛之稅耳。旋即襲據雅克薩城。於是沿江南下。過精奇里河。達公花江。赴烏蘇里江。沿途部落皆爲所奪。中國都統某氏命寧古塔章京名海色者。以大礮八門。兵士六百六十名。與俄交鋒。敗績。全軍覆沒。以滿兵六百

六十名。而盡沒於俄兵一百名之下。亦可謂耻辱之甚者。其後年哈巴羅夫歸至俄舊京莫斯科。俄廷賞爲貴族。並以其名名海濱之會城。今伯利城俄名哈巴羅甫喀者是也。俄人既得黑龍江及東海濱兩大部。遂以其人之名名城。以紀其功。一千六百五十四年。卽清順治十一年。俄將斯特巴諾統率哥薩克兵南下。畧黑龍江。直至寧古塔。爲中國都統沙爾呼達所敗。沒於陣。嗣後俄兵之侵略黑龍江較前尤烈。俄彼得大帝使兀魯尹經營二國疆界。滿洲守兵屢敗於哥薩克。時康熙帝旣平吳三桂。下臺灣。南顧之憂稍息。乃使伐哥薩克之兵。蓋俄人擾據滿洲之地。閱三十餘年。康熙帝十三歲時卽留意此事。細訪其土地形勝。道路遠近。人物性情。以故運餉進兵。概由清帝獨斷。不徇衆議。康熙二十四年。遣彭春率水陸軍萬五千人攻哥薩克兵於雅薩克城。陷之。旋又爲俄兵所克復。清帝遂

請荷蘭介紹致書於俄羅斯請定邊界。俄帝大彼得第一允之。一千六百九十年即清康熙二十九年五月。清帝命內大臣索額圖都統國舅終國綱。及尙書阿爾尼。左都御史馬濟護軍統領馬喇等。往主其議。並派八旗前鋒兵二百。護軍四百。火器營兵二百。令都統郎坦班爾沙。副都統納秦札喇克圖率之偕往。索額圖等奏稱。

查鄂羅斯（俄羅斯。昔稱鄂羅斯。或稱羅刹。皆係譯音）所據尼布楚本係我茂明安部游牧之所。原非羅刹所有。亦非兩界隙地也。况黑龍江最爲握要。未可輕視忽之。由黑龍江而下。可至松花江。可至嫩江。南行可至庫爾翰江。及烏喇。甯古塔。錫伯。科爾沁。索倫。達呼爾諸處。若向黑龍江口可達於海。又恒滾牛滿等及淨溪里江（即精奇里河）口。俱合流於黑龍江。環江左右。均屬我屬鄂倫春（即俄樂春）奇勒爾

畢喇兒等民人及赫真費雅喀所居之地。不盡取之。邊兵終不獲安。臣以爲尼布楚雅薩克黑龍江上下。及通此江之一河一溪。皆屬我地。不可棄之於鄂羅斯。

清帝允之。旋因喀爾喀厄魯特有戰爭。清兵因道阻不得行。乃召回索額圖等。迄康熙二十八年四月。復遣索額圖等往會議。官兵同往者倍增。且調黑龍江兵千五百人各帶仗械由水路赴尼布楚。索額圖等奏稱。尼布楚雅薩克。既係我屬所居地。臣等請仍如前議。以尼布楚爲界。此內諸地均歸於我。

此尼布楚原屬中國版圖之明證。且是時中國兵力方雄。俄人越國略遠懸軍深入以與中國交鋒。而中國當道怠懦因循遽行退讓。清帝竟諭示索額圖曰。

今以尼布楚爲界。必不與鄂羅斯。則彼遣使貿易。無棲托之所。勢難相通。爾等初議時。仍當以尼布楚爲界。彼使臣若懇求尼布楚。可卽以額爾古納爲界。

中國五大臣等遵諭集議。康熙二十八年。清廷領侍衛內索額圖等與俄羅斯使臣費岳多等會於尼布楚斯克。締結條約六條。（此爲中國最早之國際條約。）茲將當時所立界牌（卽約文）節錄於後。一將由北流入黑龍江之綽爾納卽烏倫穆河相近格爾必齊河爲界。循此河上流有右大興安嶺（按滿州語興安卽嶺字之意。原不必再加嶺字。稱大興安嶺。係從漢譯之習稱）以至於海。凡屬於嶺南一帶流入烏龍江（卽黑龍江）之溪河。盡屬我界。其嶺以北一帶之溪河。盡屬俄羅斯界。（下略）

比卽尼布楚條約之條文。此約以斯塔諾威山（外興安嶺）爲界。山外盡屬於俄。額爾古納河右岸亦歸俄屬。因此約。滿蒙所屬數百萬方里領土。遂入俄國版圖。清廷大員旋奏定在格爾必齊河。額爾古納河諸地立碑。康熙二十八年十二月丙子。命遣官立碑。尼布楚從此淪爲俄土。（蘇俄曾有退還宣言。究其實。亦口惠而實不至。）查尼布楚亦作尼布潮。或尼布抽。尼布綽。又作泥撲處。泥撲楚。又作你不楮。疑不錯。紀載諸書往往誤分爲數地。乾隆五十八年。經黑龍江將軍遵旨查明尼布楚城。前經使臣定議屬俄羅斯。然後此地之原委始明。康熙三十九年清康帝云。

尼布楚等處。原係布拉忒烏梁海諸部（茂明安諸部落）之地。（蒙

古屬地）彼皆林居。捕貂以爲業。稱爲樹中人。（元秘史云。兔兒年成

吉思汗命拙赤領右手軍往征林木中百。姓卽謂樹中人也。）後俄羅



斯強盛。遂併吞之。可見地本非其有。特中國不力爭耳。

## 二十 俄人侵略烏里雅蘇臺以西之地

邊地卡倫向分三等。有常設、移設、添撤之分。歷年不移。而設有定地者。是謂常設之卡倫。駐卡之兵。有時在此處安設。有時移向彼處。或春秋兩季遞移。或春、冬兩季遞移。或春、夏、秋三季遞移者。是謂移設之卡倫。有其地雖有卡倫。而有時過時則撤者。是謂添撤之卡倫。卡倫之設。本祇禁游牧人私行出入。初無關於界址。故常設之卡倫。至近者距城或不過數十里。迄咸豐十年十月初二日。中俄二國在北京立約十五條。其第二條云。西疆尙在未定之交界。此後應順山嶺大河之流。及現在中國常駐卡倫等處。及一千七百二十八年即雍正六年所立沙濱達巴哈之界牌。

末處起。往西直至齋桑淖爾湖。自此往西南。順天山之特穆爾圖淖爾。南至浩罕邊界爲界。

此約指明以常設卡倫爲界。嗣同治初元。將軍明誼與俄官勘界。俄官堅執常設二字劃界。明誼再四辯論。清廷總理各國事務衙門亦力與爭衡。謂中國卡倫向無常設與不常設之分。必當以最外卡倫爲界。俄官堅執不從。清廷不能挽回成約。而俄人遂洊食六千里地。以逼處伊犁塔爾巴哈臺。烏里雅蘇臺以西之界。遂蹙其面積之損失。如本部四省餘之地。

## 二十一 俄人侵略科布多所屬邊界十三處牌博地

同治八年八月。中國科布多立界大臣奎昌。咨送建立科屬邊界牌博約誌三條。其第一條云。

自科布多東北邊界賽留格木適中之布果素克達巴哈起。向西南順賽留格木山嶺。至奎屯鄂拉。即往西行。沿大阿勒臺山至海留圖兩河中間之山。轉往西南。順此山直至察奇勒莫斯鄂拉。轉望東南。沿齋桑淖爾邊。順喀喇額爾齊斯河岸。至瑪呢圖噶圖勒幹卡倫。分爲兩國交界。計此一段。共立牌博二十處。(一)首起即於布果素克達巴哈建立牌博一處。(二)次接於杜爾伯特達巴哈。建立牌博一處。(三)於塔布圖巴哈。建立一處。(四)博勒奇爾。建立一處。(五)察幹布爾噶蘇。建立一處。(六)烏蘭達巴哈。建立一處。(七)巴喀那斯達巴哈。建立一處。(八)薩爾開。建立一處。(九)巴爾哈斯達巴哈。建立一處。(十)拜巴塔達巴哈。建立一處。(十一)庫爾楚木。建立一處。(十二)特勒克梯。建立一處。(十三)固洛木拜。建立一處。(十四)薩拉陶。建立一處。(十五)薩

勒欽車庫。建立一處。(十六)特勒斯愛哩克。建立一處。(十七)鄂里雅布拉克。建立一處。(十八)奇音克里什。建立一處。(十九)察奇勒莫斯。建立一處。(二十)末至瑪呢圖噶圖勒幹卡倫。建立一處。共計建立牌博二十處。

此約曾於光緒七年指明修改。同年勦立界牌。割去第七牌博(巴喀那斯達巴哈)以西之地。所有由第七牌博(薩爾那開)至第二十牌博(瑪呢圖噶圖勒幹卡倫)凡十三處牌博之地。悉歸於俄。蓋瑪爾喀庫里四周一帶。土壤膏腴。久爲俄人所窺伺。而齋桑淨爾四周。自此亦咸隸俄羅斯版圖。

## 二十二 俄人侵略烏梁海一貂之地

喀爾喀所屬之烏梁海。康熙間既屬於中國。準噶爾所屬之烏梁海部人。則乾隆間始爲中國所屬。自定界以外。直抵俄羅斯。別有屬俄國之烏梁海人。貢貂於俄國。烏梁海部落雖小。然金山、劍海之間。古爲用武之地。與中國亦有關係。查烏梁海。卽明時之兀良哈部族。至於清有清屬之烏梁海。歲以五貂貢於清。有俄屬之烏梁海。歲以五貂貢於俄。其附近之境。又有中俄各弭一貂之烏梁海。至雍正五年始議停止。攷雍正五年中俄喀爾喀界會議通商定約十一條。其第三節有云。

其兩邊各弭五貂之烏梁海。令照章各歸其主。彼此各徵一貂之烏梁海。自定界之日起。將各收一貂之處。永行停止。

嗣後俄人逞狡違約。仍私征一貂如故。清廷祇事敷衍。竟置不聞。

## 二十三 俄人侵略吉黑蒙疆西域回部諸邊地

俄人蠶食中國領土。筆不勝書。有如圖們江左岸伯力東南有二道溝地方。舊隸中國版圖。自咸豐八年割歸俄領。該地有華民田畝六七十萬。响。乃被俄人驅逐矣。同治十年。俄襲烏垣。（漢書作烏桓）入綏來而沙山開屯田。爲耕戰地。浸假而中國之北路伊犁。南路喀什噶爾諸邊地。蠶食殆盡矣。光緒六年伊犁條約。俄人割取曲城以西之八城。光緒七年改訂伊犁界約。其南舊界原沿南流之達喇圖河爲界。後改進沿在內之蘇木拜河爲界。亦與同治三年舊界不同。此約敘明順同治三年舊界。而勘界者。兩處均割棄舊界矣。喀拉達巴罕同治三年尙屬中國領內地。及光緒七年塔爾巴哈臺界約。已視爲交界之地。光緒八年喀什噶爾界約。自木羅爾特山口至拍斯塔格山口一段。不順天山正脊而向南作弧綫爲界。於是分水界。渚阿克蘇河源（此劇一阿克蘇）遂割入俄境。爲光緒

八年、十年兩次喀什噶爾界約所本。當會紀澤繕進和約稿本時。曾注明云。以上塔爾巴哈臺。喀什噶爾兩處分界之事。最爲緊要。似宜由勤明剛正。通達和平之大員細意履勘。乃能妥協。蓋知此界之不易勘也。乃其後。果失邊隘。光緒十年在其他互換喀什噶爾西北界約之新瑪爾葛拉城。故浩罕地。已屬俄侵占。阿勒巴沁卽雅克薩城。爲康熙時收回地方。亦復屬於俄人。哈薩克本回部。舊爲中國羈縻地。嗣亦被俄羅斯所侵併。爲俄境仙米波廷省等處地方。

## 二十四 俄人侵略布魯特

西域布魯特（卽布羅特）古之循休拓毒地。分東、西、二部。東部有五。如天山北準部之西南。舊游牧於特穆圖泊左右。部長稱鄂拓克。後爲準

噶爾所逼。西遷於安集延。及清軍定伊犁。乃復故地。乾隆二十三年。戶口歸附於清。散處新疆回疆卡外。西部十有五。在蔥嶺西。於乾隆四十年。歸附於清。各授其頭目品官。（二品至七品）通貢市。迄道光之季。大吉利吉思部。服屬於俄。布魯特（亦吉利吉思族之一部）亦爲俄人所征服。於是俄疆直接伊犁。中國之邊患日亟。

## 二十五 俄人侵略塔什干

塔什干爲西域城郭回部。一統志作塔什罕。在蔥嶺直北四百里外。卽喀什噶爾之北一千三百里。東至布魯特。東南至那木干。東北至右哈薩克。漢爲康居。大苑。接界之地。北魏爲九姓昭武所居。唐爲安國石國。明爲塔什罕國。其土地已鄰鹹海。地居平原。向有三和卓。分轄回衆。曰莫爾多。



薩木曰沙達曰吐爾占。舊爲右哈薩喀所羈屬。莫爾多薩木者。爲哈薩喀所置和卓。吐爾占逐之。哈薩克以兵問罪。糾紛歷久不解。乾隆二十三年。參贊大臣富德。追討哈薩克錫拉。至其地。遣都統撫定塔什回衆。塔酋卽遣使奉貢表。求內屬。先是有準噶爾部逸賊額什木札布。在其境內。於是禽獻於清。其年遣使來北京朝貢。賜宴如外藩例。後附於浩罕爲屬城。及俄人滅浩罕。塔什干亦隨同被俄羅斯吞滅。俄乃置土耳其斯坦總督。設重鎮於塔什干。

## 二十六 俄人侵略布哈爾

布哈爾（卽布哈拉）爲西域回部之大國。在巴達克山之西二千餘里。其地漢時爲難兜國。漢書西域傳。難兜國王治去長安萬一千五百里。

東北至都護治所八百九十里。西南至罽賓三百三十里。元人曾於其地置行省。建制設官如例。其東南毗連北印度之克什米爾。南界阿富汗。西南界波斯。北境抱鹹海而達裏海。乾隆二十五年。回部底平。遣使頒敕諭之。至二十九年。其部長阿布勒噶爾。遣使諾羅斯伯克達雅爾伯克因巴達克山汗素爾坦沙。籲請以其屬內附於清。迄道光七年。其汗曰那司爾臘者。以歐洲兵法部勒軍隊。勢凌四隣。及俄人侵略土耳其斯坦。布哈爾人懼。乃與浩罕合兵擊俄。爲俄所敗。俄兵圍布哈爾。至同治七年。乃向俄乞和。締盟如左。

(一) 此後布哈爾汗國。歸俄保護。

(二) 布哈爾汗。當償金五十萬羅卜於俄。且撤馬兒罕 (元時故城) 以下。凡俄軍所得土地。悉讓於俄。

於是昔之受保護於中國者。倏忽成爲俄羅斯之屬國。聞俄人向於回部所屬之些押夫珊河。別開支港。引水灌田。而河據布哈爾之上游。若俄人於上流絕其水源。則布人舉國有缺水之患。故布人不得不請屬於俄。而事之維謹。不敢稍抗。

## 二十七 俄人侵略浩罕汗國

浩罕又稱霍罕。俗稱安集延。卽漢之大宛。康居其實安集延。不過浩罕之東一大城耳。其國有四大城。最東爲安集延。又有瑪爾噶郎城。納木干城。浩罕城。又所屬小城三。曰窩什。曰霍闌。(卽霍占)曰科拉普。塔什干後亦附之。故浩罕又稱八城。又安集延之東爲烏茲根。烏茲根之南曰古里察。(卽西域水身記之古里峽)凡在納林河南北者。昔時皆常入貢。

於清。乾隆二十四年。清軍追霍集占。霍欲投浩罕。浩人不納。其首額爾德尼旋上表於清廷。請內附。且貢馬匹。於是四城克伯。咸來服屬。乾隆二十五年。伯克托克托瑪哈墨第等又來朝貢。詎其後匪特不賴中國之保護。且時爲中國之邊患。道光十年。浩罕安集延寇我邊境。先是直隸總督那彥成。以欽差大臣赴回疆。辦理張格爾亂之善後事宜。奏驅歷年留商內地之安集延人出卡。且沒收其貲財。諸回商憤怨。糾結布魯特。安集延衆。共萬餘寇邊。是年春。攻圍喀什噶爾。英吉沙爾特二城。分兵犯葉爾羌城。有客民及回郡王先後報警。而清廷大臣扎隆阿等皆不信。後聞警。始遣兵八千擊之。叛回以少數之兵。誘清兵入險。而截其後路。回皆騎兵。而清兵步多騎少。不能衝擊。先後覆沒。清廷命總督楊逢春及參贊哈朗阿。楊芳進擊。敗之。而伊犁參贊大臣容安。撤重兵八九千。反繞道烏什。趨無敵。

人蹤跡之和闐。致喀英二城圍久不解。後中國大兵出塞。亂乃底定。事緣有回酋波羅尼都者。遺種於其地。浩罕藉其和卓之名。遂有狐假虎威之舉動。和卓者。猶言聖裔也。乃祖默罕謨德。創立回教。其子孫分布西域。稱和卓木回人。以其教祖貴族。咸尊敬之。浩罕遂擁其回教聖裔張格爾。攻陷四城。嗣復擁玉素普抄涼喀城。爲中國邊患。塞外有吉利吉思族者。本游牧之民。時或南徙基華浩罕境內。故俄羅斯屢與二國因邊境事生齟齬。俄商因時遭彼等掠奪。道光二十六年。俄人遂於阿拉海沿岸築拉耳斯克城堡。哥里米戰後。益專意中亞細亞。漸沿西爾河以侵浩罕汗國。時浩罕汗國力與布哈拉汗爭。不能專力防哈。道光七年間。布哈拉基華浩罕三汗國構爭。俄人因進兵侵略土耳其斯坦。浩罕又與布哈拉合兵擊俄而大敗。一說作浩罕之西。有布噶爾國。勢尤强大。道光二十二年。浩

罕遂爲所滅。俄將高福滿。頻進兵取霍闡及撒馬兒罕。浩罕汗遂臣服於俄。旋因國人不悅。屢殺俄人。光緒二年。俄將司古拜烈夫。率兵滅浩罕。取其地入版圖。改稱爲黑耳家孛州。（費爾干省）使歸俄領土耳其斯坦管轄。當時新疆叛亂未靖。故俄滅浩罕之事。清廷竟漠然不知。

## 二十八 俄人侵占伊犁勒索權利

以上所紀述。皆俄人蠶食我邊鄙之事實。若夫用威力以猛嚇中國。凌壓中國者。則又有數事。當一千八百七十一年間。俄方銳意侵略中亞細亞。以兵溯伊犁河。占領曲城。於是中俄兩國遂起伊犁問題。因其時有約克勃可汗者。浩罕汗張格爾之子也。欲廢其子而自領其衆。遂略取喀什噶爾。併吞天山南路地。清廷聞之。乃命陝甘總督左宗棠進剿。一時未平。

俄國之斯米列鎮士克省。頗受戰事影響。俄人乃以亂黨騷擾爲名。於同治十年占領新疆之曲城。清廷未之知也。至光緒三年。約克勃汗死。清軍掃平天山南路。轉兵向天山北路。見伊犁爲俄軍所占。乃命俄人退兵。俄人不允。光緒四年。清廷乃遣崇厚使俄。議其事。崇厚昏憤。以伊犁一部分之曲城還中國。而帖克斯河等地。仍由俄占守之。且允償占守費五百萬盧布。時物議大譁。張之洞之奏尤激烈。清廷乃廢此約。遣曾紀澤使俄。重開談判。光緒七年。再訂新約。中國償還俄國自一千八百七十二年以來占守伊犁之費用九百萬盧布。允許俄國在伊犁、蒙古、滿洲各地貿易。有設置領事之權。及各種貿易上所有特權。與夫松花江、烏蘇里江航行之權。計俄人此次歸還伊犁地方約千餘里。雖已改設行省。然俄人既占領中央亞細亞。併吞諸小國。覬覦新疆。日益迫逼。而逼索所得之權利。蔓及

我東北、西北。要而言之。俄人東侵之政策。殆欲東掠滿洲。西擣新疆。而中則貫穿蒙古。蒙古、新疆、事均已詳上文。茲將滿洲事一詳述之。

## 二十九 俄人計侵滿洲

中日、甲午戰爭。旅順。大連灣。爲日本所占領。及馬關議和。清廷訂立割讓遼東半島及臺灣。澎湖與日本之約。其第二款云。

下關劃界以內之奉天省（現改遼寧省）南邊地方。從鴨綠江口溯該江以抵安平河口。從該河口割至鳳凰城海城及營口而止。劃成折綫。以南地方。所有前開各城市邑。皆包括在劃界綫內。該綫抵營口之遼河後。卽順流至海口止。彼此以河中心爲界。遼東灣東岸及黃海北岸。及奉天省所屬諸島嶼。亦一併在所議境內。



乃俄人別蓄狡謀。聯合德法兩國。出而干涉。勒令日本退還此地與中國。日本方經大戰之後。無力以抗拒絕。光緒二十一年。日人強抑忍受俄德法三國之干涉。向中國索取償金三千萬兩。而以遼東半島還中國。俄人之陰謀既遂。清光緒二十二年（一千八百九十六年）九月三十日。遂有喀西尼之密約出現。即世人所稱爲中俄密約或滿洲密約者是。此約由俄國駐北京公使喀西尼伯爵以黃金運動得之於滿清朝臣者也。溯厥條約之所由來。實緣李鴻章自締結馬關條約歸國後。見病於清廷。屏居閒散之職。俄使際此絕好時機。乃賣恩於李。一千八百九十四年十二月。俄皇亞力山大第三崩。一千八百九十六年五月二十六日。俄皇尼古拉士第二行加冕之禮。清廷欲使王之春前行賀禮。喀西尼不許。曰如斯大典。捨李鴻章而外。無人足當之。清廷聞俄使言。如雷震耳。因復起李

鴻章爲全權大使。於是攜此喀西尼密約草稿赴俄爲賀禮。並簽字訂立。滿洲恭親王奔訴聞之。掉頭瞑目歎曰。持此文書去。余不欲觀之。清帝亦愁眉不展。宗人府中舉疾首蹙額相告。於是滿人所謂祖宗發祥之地。悉委之於俄人。聞喀西尼氏又嘗以品物買歡心於清太后。那拉氏（卽慈禧太后）並說之曰。日人雖已還遼。然其恨貴國已銘心鏤骨。方圖大復仇。今聞英日有聯盟之意。將來英必以重兵助日人。日人將捲土重來。彼以重兵由威海衛進取北京。直如探囊取物。此時爲貴國之援助者。其惟敵國。敵國與貴國友誼最篤。不敢辭犬馬之勞也。清太后惑之。遂墮其術中。其所立密約。許俄以橫斷滿洲北部之東清鐵路特別利權。自後貝加爾及烏蘇里綫起。與中國黑龍江之西及吉林東境之鐵路及支綫相連絡。（由滿洲驛達利哥士克）並有開採煤鑛之特權。（其後租借旅大

時。東清鐵路公司條例又增敷款。設一支綫。由哈爾濱縱斷滿洲以與旅順大連兩處聯絡。是爲南滿支綫。茲將世傳該密約之大要揭左。

第一條 以俄國西伯利亞鐵路之將成。中國許其延長路綫。由海參威至琿春。海參威與琿春相距約四百里。不知者多以海參威爲琿春。殊屬非是。由琿春至吉林之首府。現改永吉縣。爲吉林之省會。又西伯利亞之某都府。至黑龍江省愛琿。齊齊哈爾。伯都訥。吉林府。

第二條 吉林省並黑龍江省改建設俄國鐵路。俱由俄國自理。其建造方法及規則等。一切皆依俄式。於中國政府。毫不能干涉。其全綫皆歸俄國管轄。以三十年爲期。期滿之後。中國得以適當之評價。贖買其鐵道車輛倉庫等類。而其贖買之方法。須俟後來更議。（中後從略）

第四條 中國將由山海關。牛莊。蓋平。金州。旅順口。大連灣等處。建造

鐵道爲俄國通商之便利計。當依俄國之式。（中略）

第十條 旅順口。大連灣。並其附近等處。乃軍略上之要地。爲預防將來之危險。速當修繕其堡塞。置重要之守備。俄國爲保護兩港。此必要之助力也。不許他邦侵入其地。中國有決不能以此地再讓與他邦之義務。儻將來或有事起。當危急之時。或俄國與他邦交戰等事。中國爲令俄國攻守之便。一時得許其海陸軍屯紮於兩港。（下略）

此卽滿洲滅亡之原因。亦爲釀成日俄戰局轟震全球之原動力。顯此約第九條。乃言膠州灣之租借事。是膠州灣本已入俄人掌中。不意殺教士之風潮驟起。德皇心靈手敏。賜鐵券於軒利親王。使率艦隊攫膠州灣。而納之德人囊中。俄人敢怒而不敢言。乃英、德、二國。又連同借外債於中國。破俄國之貸款。俄公使巴布羅夫大怒。旋出強攬手段。以特別外交政

策得旅大永租權二十五年之承諾於清廷。光緒二十四年三月初六日。李鴻章張蔭桓與俄公使巴布羅夫。在北京締結中俄條約九條。略云。

(一) 爲保全俄國海軍在中國北方海岸得有足爲可恃之地。大清國皇帝允將旅順口。大連灣。暨附近水面租與俄國。俄國租借地區之北界。自遼東西岸金州灣之北起。至金州灣山背。(山背亦捲入租界) 由窄通處達遼東岸貔子窩之北一帶陸地。以及水面各島。一例劃入俄國租界。

(二) 隙地(中立地帶)之北界。遼東西岸蓋州河口起。經岫巖城北。沿大洋河左岸。而至大洋河口一帶。皆屬俄國租界。

(三) 西伯利亞鐵道支綫之終點。至旅順口。大連灣。以及其他之口岸。所有經過地方鐵道之利益。不得讓與他國人。惟中國將來山海關鐵

道之支綫。可以延長至該處附近。

(四)俄國政府允准中國政府之請。將金州城自行管理。並於城內設立警察。惟金州中國之兵。應即撤去。易以俄國之兵。俄國並准金州城之居民。由俄國租界之北各道路往來。平常並有在該城附近取汲飲水之權。惟周圍之海岸。中國人不得使用。

(七)俄國認在所租之地。而旅順。大連灣。兩口爲尤要。備資自行蓋造水陸各軍所需處所。建築礮臺。安置防兵。總設所需各法。藉以着實禦侮。並認以已資修養燈塔。以及保航海無虞之所需各項標誌。

此俄國永租旅大之經營。而中國實不啻已立割地喪城之券於俄也。俄人既租旅大。海陸軍之基礎已固。時思張牙舞爪以攫取滿洲全部。會庚子拳變。俄人乘千載一時之機遇。藉保護鐵路爲口實。以進兵滿洲。先

是庚子六月十一、二、等日。海蘭泡有俄兵數千。欲假道愛琿、卜奎（即齊齊哈爾城）至哈爾濱。保護鐵路。俄海蘭泡將軍固畢乃脫爾。先以公文告黑龍江壽將軍。壽不允。其言曰。江省鐵路。當由敝國自行保護。若貴國必欲發兵前來。則本將軍惟有以軍火從事。旋得俄將軍覆文。略曰。江省鐵路。貴國代爲保護。敝國實不能深信。然中俄二國久敦睦誼。二百來年。從未輕啓兵釁。今貴將軍定與敝國軍火從事。足見貴將軍英雄勇武。實爲中國不可多得之員。敝國亦惟命是聽。十五日。壽發電於愛琿副都統鳳翔。令戒備。且曰。如俄兵過境。宜卽迎頭痛擊。勿令下駛。而副都統自度愛琿兵備空虛。不足以一戰。仍電致壽將軍諫阻。壽不省。十七日。清晨。有俄國兵艦五艘。拖帶駁船十三艘。載俄兵一千數百名。由黑龍江下駛。鳳翔發電告壽將軍。卽得壽電力申開戰之令。於是愛琿所練靖邊各軍。卽

開赴沿江各溝駐防。十八日晨。又有俄兵艦一艘。裝載軍貨等物下駛。其護送者爲界官廓米薩爾。（俄官名）當駛至愛璿上江二十里三道溝時。卽有中國統兵官恆統領出而阻止。曰。奉有軍帥電飭。不許俄國兵艦往來江上。廓米薩爾舍舟登岸。與之辯論。恆統領堅執不允。廓米薩爾忿回船。放兩槍相恐嚇。斷將開礮。而清軍之礮已先發。俄兵官二人殲焉。廓米薩爾亦中礮。急裹創乘舢舨回海蘭泡。事後。鳳副都統以兩軍互擊情形電告壽。壽卽發電致俄將軍固畢。乃脫爾。責其輕易開仗。啓釁之咎。惟俄實尸之。其電由副都統派武弁送至廓米薩爾處。時廓米薩爾重傷。僅存一息。猶能張口與武弁言。誓必翦滅黑龍江而後已。自十八日開仗後。黑河統兵官崇統領。卽連日開礮向海蘭泡攻擊。俄兵亦以開花礮還擊。二十日及二十一日。俄派馬隊數旗至愛璿城東。將二十八屯居民。聚



之一大屋中。焚斃無算。逸出者不及半。其在海蘭泡貿易之華商。約有六千餘人。先於十九日被俄兵驅之於江濱。佯許以派船護送歸國。商民聞言。卽在江邊饑露立待。詎二十日下午。忽有俄馬隊持槍兵三十名。持斧兵二十名。向商民擊砍。槍斧交下。商民出不意。惶遽奔逸。均墮黑河而死。其餘水得免者僅百數十人。二十二日。鳳翔見俄兵在江東恣行焚戮。意良不忍。遂派馬隊三百名渡江。驅逐俄兵。並以保護屯民。甫過江。卽與俄兵相遇。兩軍鏖戰一時之久。將俄兵擊退。俄兵死傷百餘人。二十三日。前敵營務處來鶴。鑒於江東之敗。恐孤軍虛懸。爲敵所乘。且二百馬隊之渡江。非其本意。實由鳳翔主其謀。故來鶴深忌之。卽乘此時遽傳令過江之兵盡數撤回。俄兵見清軍兵單勢怯。果萌窺伺愛琿之念。卽於二十四日。列礮江邊。日向清軍轟擊。愛琿之失。實基於此。二十六日。有俄步兵六千

名。從黑龍江上游五道河偷渡黑河。崇統領營中登高望見之。以其穿清軍軍服。疑爲漠河護礦之兵。遇亂逃回。未敢開礮轟擊。殆其登岸。始知爲俄軍。已措手不及。崇統領所部各兵。卽時驚散。退至愛琿。崇統領亦陣亡。二十七日。俄兵卽由西山陸路直撲愛琿。其時鳳副都統已承將軍電飭赴前敵督戰。遂率駐防各溝之靖邊軍。退至兜溝子。無與俄軍迎戰者。二十九日。俄兵遂入愛琿城。清軍退守兜溝子。其地詎愛琿七十餘里。俄人旋於七月初四日率兵進攻。仍用開花彈遙擊。鳳副都統以戰爲守。相持累日。顧兜溝子地勢平衍。雖有高岡。不足以資握守。且鎗礮鏽澀不可用。較俄軍之能命中及遠。兼用銅彈者。有利鈍之殊。故清軍累戰失利。死亡相屬。兼以黑龍江行軍素無棚帳。軍士晝則忍饑苦戰。夜則露宿。咸出怨言。鳳副都統知難抵禦。又恐將士譁潰。乃於初十日結陣徐退。十二日至

距兜溝字一百六十里之北大嶺（內安與嶺）其地爲愛琿之後路。齊哈爾之門戶。最爲險要。而中國三百年來。從未於其地築一礮臺。設一重鎮。故倉猝時不能阻敵兵前進。是時俄兵見清軍退守。卽跟蹤而入。十六日。全軍進逼大嶺。鳳副都統急率隊迎擊。交戰時。清軍祇有鎗而無短刀。俄兵兼而有之。其利百倍。故清軍之當前敵者。非陣亡卽奔潰。後隊亦幾爲所牽動。鳳副都統見勢不支。恐全軍盡覆。因卽傳令各軍。暫爲退守。徐圖後計。初三日。俄軍前隊陸續抵齊哈爾城。程知府出爲照料。供張頗具。其軍均屯關外。民間若不知有敵至。午後忽聞槍礮聲大作。將軍將傳令閉城。令程知府出偵其故。旋知是時適奉天仁字軍到。奎與俄兵遇。卽開槍相擊。俄軍還礮禦之。劇戰良久。力不支。陣亡將士二百餘人。餘軍悉逃竄。初四日。俄軍後隊亦到。俄將必欲入城。見將軍。將軍聞之卽作

遺書致俄將。請勿殺居民。書畢。呼從者昇柩入。朝衣冠從容臥柩中。取金器吞入腹中。驟不得死。命其子開槍擊之。其子手顫不忍發。誤中左脇。不死。又命其家將繼之。一彈中小腹。猶不死。呼聲益厲。家將呼曰。如此宜令死。免受痛苦。復開一槍。洞胷而死。時俄軍入城。副都統薩保乞降。至是黑龍江省全歸俄。俄兵於八月初一日又攻襲營口。時義和團已入境。不能禁止。初六日晨六時。義和團聯合清軍與俄兵交戰。自晨至午。互有死傷。拳黨卒一敗塗地。午後俄艦即開大礮轟擊。共開三百餘發。商民死者數千名。沿河房屋大半擊燬。營口遂爲俄兵占據。俄兵無紀律。槍掠財物。姦淫婦女。男子過半被其砍死。屍橫徧地。至吉林一省之失。則尤無異於跪獻。先是有奉天送到義和團目金姓及拳黨六十人。吉林將軍長順列隊郊迎。團目僞稱有懿旨。總統吉林義和團大臣金法師名片。文告均用黃

紙來時勒令將軍以下均行跪接。將軍等每日赴壇頂禮兩次。嗣召本地義和團前往謁見。詰以奉何人之命。在此設壇。及何師傅傳授。不能答本地拳黨欲殺之。經長順叩求乃免。嗣即搜查富戶。指爲教民。每日被殺者五六十人。長順不能禁止。本地義和團黨銜仇殺之。然一害既除。而本地義和團恃功跋扈。長順知拳黨不足恃。而吉林兵力又單。黑龍江時已先守。吉林勢難保全。乃飭已革副都統達某赴哈爾濱俄營會議。議定清兵將軍械繳出。准不屠戮。手執白旗而迎俄軍。而吉林省遂於八月二十日爲俄人占領。此滿洲被占於俄人之始末情形也。迄八國聯軍入京。俄人乃首倡退兵之議。以先求悅於滿洲朝廷。而陰行其鶴幻蟬蛻之手段。於北京移其兵力以長驅直達以至滿洲境地。清廷允立約予以權利。乞其撤兵。據壬寅（一千九百零二年）之中俄條約。原定爲分三期撤退滿

洲之兵。第一期爲是年十月八日。第二期爲癸卯年四月八日。第三期爲癸卯年十月八日。詎至第二期。俄人已不肯踐約。撤退滿洲之兵。又要求七條。清廷無力抵拒。適日本以兵力擊俄。大敗俄軍於滿洲之野。及波子瑪斯之和議成。南滿洲俄人所得之利益。悉讓而入於日本之勢力範圍。其和約第五條云。

俄羅斯帝國政府。以大清國政府之承諾。將旅順口大連灣並其附近之領土。及領海之租借權。及關聯於該租借權組成其一部之一切權利特權與割讓。移轉割讓於日本帝國政府。俄羅斯帝國政府又將在前記租借權效力所及之地域內之一切公共營造物及財產。移轉讓割於日本帝國政府。兩締約國互約須得前記所規定之大清國政府之承諾。在日本帝國政府相約當完全尊重在前記地域內之俄羅斯

帝國臣民之財產權。

第六條云。

俄羅斯帝國政府時以長春（寬城子）旅順間之鐵道及其一切支綫。及在該地方而附屬之之一切權利特權財產。及在該地方而屬於該鐵道之產業。不受一切補償。得大清國政府之承諾。移轉割讓於日本帝國政府。

自是而後。俄人不得志於滿洲。遂銳意經營蒙古。馴至唆使我同種之蒙族獨立。逐漸侵襲外蒙古。爲吞併之圖。而破我藩圉。謀奪我蒙疆。賊我外蒙古之同胞。

## 第二章 中俄蒙交涉

### 一 中俄之蒙古衝突

俄羅斯以西伯利亞鐵道爲侵略遠東之唯一命脈。若中國於蒙古置省。建制如內地。駐大軍於庫倫。則蒙古得以安保。而俄人必無所施伎。且西伯利亞鐵道不時可被中國占領。故俄國自建設西伯利亞鐵道後。其經營蒙古之意日趨堅強。不惜以種種手段誘騙蒙人入其牢籠。如對於貝加爾等處之佛教徒。特別加以優遇。以聯蒙人之感情。而對於庫倫活佛哲布尊丹巴呼圖克圖則屢遣使節。彙珍物。以訪贈之。利誘勢導。極其欺詐侵襲之能事。活佛墮其術中。漸有疏清親俄之意。及清宣統二年。日俄密約成立。俄國對於中國之侵略更一意孤行。以本國爲後援。慫恿活



佛爲蒙古君主。以繼中國之臣屬關係。活佛遂乘宣統三年中國革命之際。宣告獨立。驅逐國軍出蒙古境外。俄羅斯政府亦同時向清廷外務部提出如下之要求案。

一、中政府須認俄人自庫倫至俄邊境有建築鐵道權。

二、中政府須與蒙古訂約。聲明左列三項。

甲、中國不得在外蒙古駐兵。

乙、中國不得在外蒙古殖民。

丙、蒙人自治。受辦事大臣管轄。

三、中國所有治蒙主權改隸辦事大臣。中俄交涉。仍由兩政府協商。

四、俄飭領事官協助擔保蒙人對於中國應盡之義務。

五、中國在蒙如有改革。須先與俄國商酌。

時清廷以革命軍勢大，帝位將不保。未與俄交涉。及中華民國臨時政府成立。忙於交替改革與南北統一諸要務。亦未與俄交涉。而此期間日俄第二次密約成立。彼此進一步劃分滿蒙權利。俄政府遂令參贊官廓索唯慈於中華民國元年十一月二十一日。直接與庫倫偽政府訂下列之俄蒙協約。

一、俄羅斯政府助蒙古保守現已成立之自治秩序及蒙古編練之國民軍。不准中國兵隊入俄國邊境與華人移殖蒙地之各權利。

二、蒙古主及蒙古政府准俄國人民及俄國商務照舊在蒙古領土內享用此約所附專條內開各權利及特種權利。其他外國人自不得在蒙古享加於俄國人民所享之權利。

三、如蒙古政府以爲須與中國或別國訂約時。無論如何。其所訂之新

約不經俄政府允許。不能違背或變更此協約及專條內各條件。  
四、此友誼協約自簽押之日施行。

附約

即俄蒙商務專條。原約無外蒙字樣。祇有蒙古字樣。無外蒙地方官字樣。祇有

蒙古政府字樣。後因中國承認此附約。俄國允改蒙古爲外蒙。允改蒙古政府爲蒙

古地方官。本文係依中俄最後更正之文。

一、俄國屬下人等照舊享有權利。在所有外蒙古各地自由居住移動。  
並經理商務製作。

二、俄國屬下人等並得照舊享有權利。無論何時將俄國、蒙古、中國、暨  
其他各國出產製作各貨運出運入。免納出入口各稅。並自由貿易。  
無論何項稅課捐概免交納。

三、俄國銀行有權在外蒙古開設分行。

四、俄國屬下人等可用現銀買賣貨物或互換貨物。並可商明賒欠。

五、蒙古地方官吏不得阻止蒙人、華人向俄國屬下人等往來約定辦理各種商業。並不得阻止其爲俄人或俄人所開設商務製作各處所服役。外蒙古域內無論何種公私公司、會社、或各處所、各個人、皆不得有商務製作專賣權。

六、俄國屬下人等得有利權在外蒙古所有地內、各城鎮、各蒙旗、約定期限、租賃地段、或購買地段、建造商務製作局廠、或修築房屋鋪戶貨棧、並租用閒地開墾耕種。

七、俄國屬下人等可與外蒙古地方官協商關於享用鑛產、森林、漁業、及其他各事項。

八、俄國政府有權與外蒙古地方官協商向須設領事之處、設派領事。

- 九、凡有俄國領事之處。及有關繫俄國商務之地。均可由俄國領事與外蒙古地方官協商。設立貿易圈。以便屬下人等營業居住之用。專歸領事管轄。無領事之處。則專歸俄國各商務公司會社領袖管轄。
- 十、俄國屬下人等仍可保存其利權。得以自行出款。於外蒙古各地及自蒙古各地至俄國邊界各地。設立郵政。以便運送郵件貨物。
- 十一、俄羅斯駐蒙古各領事。如須轉遞公件遣派信差。以及別項公事需用之時。可用外蒙古臺站。惟一月所用馬匹。不過百隻。駱駝不過三十隻。可勿給費。
- 十二、凡自外蒙古域內。流至俄國境內各河。及此諸河所受之河流。均准俄國屬下之人。乘用自有商船。往來航行。及撥給停船需用地段。以爲建築碼頭貨棧之用。

十三、俄羅斯屬下人等。於運送貨物。驅送牲隻。有權由水陸各路行走。並可商允外蒙古官吏。由俄人自行出款。建築橋梁渡口。且准向經過橋梁渡口之人。索取費用。

十四、牲畜買賣地點。准發給足用地段。以作俄國牧場。如用牧場三月之久。即須償費。

十五、俄羅斯沿界居民。向在外蒙古割草漁獵。業經相沿成習。嗣後仍照舊辦理。不得稍有變更。

十六、俄羅斯屬下人等。如與華人蒙人有爭議。不能和解時。由會審委員會判決。會審委員會。分常設、臨時兩項。常設會審委員會。於俄國領事駐在地設置之。以領事或領事代表相當階級者組織之。臨時會審委員會。於未設領事之處。酌量所出事件之緊要。始暫開之。以

俄國領事代表及被告居留或所屬之旗之蒙王代表組織之會審委員會判決後。其關俄人者。由俄領事官執行。其關於華人蒙人者。則由被所屬或所居留之蒙旗蒙王執行。

蒙古爲我國屬地。無與他國締約之權。俄國欲認其爲獨立國。故擅與訂約。卽日本滅朝鮮、法國滅安南之同一手段也。原蒙古獨立不過庫倫附近數小部分而止。而該協約之精神。則俄國攫取全蒙古爲俄之保護領矣。此約締結後。俄政府公然向中國政府與日、英、法三國發通告。政府外交總長梁如浩以翌日棄職守逃天津。全國譁然。征蒙論四起。時袁世凱當國。以俄國實爲蒙古後援。不敢決征蒙之策。任陸徵祥爲外交總長。與俄公使開談判。法公使以私人資格出任調停。而日、英、法三國政府寂不發言。若皆默認該協約者。先是日、英第一、第二、第三同盟。與一千九百

零七年之日俄、日法、日美、諸協商。皆以保全中國領土。與列國機會均等爲主義。今俄蒙協約之性質。則俄國奪蒙古爲其屬地。與上數約之精神。全相反對。應爲美日英法四國政府所不肯公認。然而各國卒不發一言者。蓋由日俄第二密約成立之故。當一千九百十年之日俄第一次密約。不過日本對於朝鮮國之收局。尙未侵及滿蒙。及中國辛亥革命突起。蒙古有獨立之謀。日本遂派桂太郎於民國元年七月渡聖彼得堡與俄政府訂第二次密約。劃長春以南之滿洲。及內蒙古一部分。（卽自開原以北依柵長至寬城子間之東蒙古地域）爲日本所有。長春以北之北滿洲。及其餘之蒙古地域。爲俄國所有。約互相援助。不相牽別。蓋日政府以爲俄國經略蒙古。縱不得日本之同意。俄亦不稍減其侵略之志。以此爲交換東蒙古之條件。實日本之最好機會。而俄政府急欲使蒙古脫離中



國之範圍。以絕後患。然以與日本有保全中國領土之協約。若不將內蒙古之一部讓與日本。則俄國不能急得外蒙古。此爲該密約締結之由。同年四月二十六日。俄外務大臣薩佐諾夫於下議院發揮俄蒙關係。有內蒙古東部地方。關係於南滿洲鐵道。該部分依地理上及行政上之關係。應該爲滿洲之一部分之演說。又民國二年。中俄條約尙未簽押時。日本以南京事件索得滿蒙五鐵道權。可以證密約之不虛。俄外務大臣薩佐諾夫於該密約締結後。卽於同年九月。訪英相古烈於倫敦。許西藏之權利與英國。以交換蒙古。亦得英政府之滿意。是以俄蒙協約。卽於同年十月二十一日成立。而西藏問題。與南滿、東蒙、之五鐵道問題。皆同時並起。事實如此。日、英、俄、三國保全中國領土之約束。已潛爲變化。法國無可如何。美國大總統威爾遜。反對前政府張揚國是之政策。將舉東亞之發

言權亦拋棄之。故中國斯時之俄蒙協約問題。毫無外援之依賴。惟有哀懇俄使。求其由俄國提議。另訂中俄協約。以取消俄蒙協約之一法。自元年十一月起。至二年七月。外交總長陸徵祥與俄使會議二十餘次。最後協定草約。由袁世凱於同年七月。提出國會。要求同意。其全文如左。

中俄兩國爲免除蒙古現狀所能發生之誤會起見。協定條件如下。

一 俄羅斯承認蒙古爲中國領土完全之一部分。茲特擔任於此領土關係之繼續。不謀間斷。又此領土關係上生出之中國歷來所有之種種權利。俄羅斯並擔任尊崇。

二 中國擔任不更動外蒙古歷來所有之地方自治制度。並因外蒙古之蒙古人在其境內有防禦及維持治安之責。故許其有組織軍備及警察之專有權。並許其有拒絕非蒙古籍人在其境內殖民之權。

三俄羅斯一方面擔任除領署衛隊外。不派兵至外蒙古。並擔任不將外蒙古之土地。舉辦殖民。又除條約所許之領署外。不設置他項官員代表俄羅斯。

四中國願用和平辦法。施用其權於外蒙古。茲申明聽由俄羅斯調處。照上列各條之本旨。定立中國對待外蒙古辦法之大綱。並使該處中央長官。自認有中國所屬部內向有之地方官吏性質。

五中國政府因重視俄羅斯政府之調處。故允在外蒙古地方。將下開之商務利益。給與俄人。（即俄蒙附約商務專條）

六以後俄羅斯。如與外蒙古官吏協定關於改動該地制度之國際條件。必須經中俄兩國直接商議。並經中國政府之許可。方得有效。

此協約之第一款。全係虛文。第二款。將中國舊日於蒙古置軍隊警察

殖民之權利。全然劃出。第三款。雖云俄國除領署衛隊外不派兵。然衛隊無數額之限制。且商務專條第八款。俄國有與蒙古官吏協商設領事之權。其流弊必至領署無限制。俄兵亦無限制。又雖聲明不舉辦殖民。然商務專條。俄人於蒙古租地、購地、建房、開墾、無所不可。而有領事及有關於俄國商務之處。皆設貿易圈。歸俄人管轄。直與居於其本國地內無異。非殖民而何。是中國不能殖民。而俄國反能殖民。第四款。雖寓取消蒙古獨立之意。然留中央字樣。又第六款。有國際條件字樣。夫既不認蒙古獨立。有何中央。有何國際。且云以後俄蒙協定之國際條件。必經中國認可。方得有效。然則以前之俄蒙協約。雖不經中國認可。亦可以有效。是明明承認俄蒙協約。卽承認蒙古獨立也。故此約當時經國會不同意之否決。因此該協約不能成立。繼外交總長孫寶琦。重與俄羅斯公使磋商。但卒與

前協約之精神。毫無變更。而關於外蒙古自治範圍之區域。我國雖主張限於庫倫勢力所及之喀爾喀四部。然俄國堅持科布多亦編入自治範圍之內。袁世凱竟許之。十一月四日。袁世凱以國民黨議員。悉與第二次革命有關繫之命令。取消議員資格三百六十餘人。使國會不足法定人數。即命孫寶琦於翌日（五日）於下列之中俄條約簽押。

聲明文件。

關於中俄兩國對待外蒙古之關係。經業大俄羅斯帝國政府。提出大綱。以爲根據。並經大中華民國政府認可。茲兩國政府商訂如下。

一 俄羅斯承認中國在外蒙古之宗主權。

二 中國承認外蒙古之自治權。

三 中國承認外蒙古人享有自行辦理自治外蒙古之內政。並整理本

境一切商工事宜之專權。中國允許不干涉以上各節。是以不將兵隊派駐外蒙古。及安置文武官員。且不辦殖民之舉。惟中國可任命大員。偕同應用屬員。暨護衛隊。駐紮庫倫。此外。中國政府。亦可酌派專員駐紮外蒙古地方。保護中國人民利益。但此點應按照本文件第五款商訂。俄羅斯一方面擔任各領事署護衛隊外。不於外蒙古駐紮兵隊。不干涉此境內之各項內政。再不在該境有殖民之舉動。

四中國聲明承認俄羅斯調處。按照以上各款大綱。以及一九一二年十月二十一日俄蒙商務專件。明定中國與外蒙古之聯繫。

五凡關於俄羅斯及中國在外蒙古之利益。暨各該處因現發生之各問題。均應另行商訂。

聲明另件

一俄羅斯承認外蒙古土地。爲中國領土之一部分。

二凡關於外蒙古政治、土地、交涉事宜。中國政府尤與俄羅斯政府協商。外蒙古亦得參與其事。

三正文第五款所載隨後商訂事宜。當由三方面酌定地點。委派代表接洽。

四外蒙古自治區域。應以前清駐紮庫倫辦事大臣。烏里雅蘇臺將軍。及科布多各參贊大臣。所管轄之境爲限。惟現在因無蒙古詳細地圖。而該各處行政區域又未劃清界限。是以確定外蒙古疆域。及科布多。阿爾泰。劃界之處。應按照聲明文件第五款所載日後商定。

依此商訂。俄國雖認蒙古爲中國之領土。然僅承認其宗主權。夫宗主權三字。準國際實例上。意義殊不一致。如一九零七年之英俄協約。英俄

二國認中國於西藏之宗主權。二國允不干涉西藏之內政。並不經中國政府不與西藏辦交涉。此中國於西藏之宗主權。實有內政、外交之一切主權也。又英國承認土耳其對於埃及之宗主權。則僅有其空名。埃及實不啻爲英國之領土。今此商訂。中國於蒙古既不能干與其內政。又無監督蒙古外交上之專權。則其宗主權之範圍。從可知矣。且中國既承認俄蒙商務專條。而不收外交之監督權。以未開化之蒙人。豈能負重大條約上之責任。則蒙古政治勢力。必全歸俄有無疑。民國肇立之初。卽捐重要之屏藩。而以後英國對於西藏。完全照此辦理。日本對於東蒙。完全視爲彼國之勢力範圍。蓋皆由於民國元年日、英、俄、三國密約。破壞中國領土保全之局勢所由來也。

## 二 日俄同盟



日本乘歐戰之初。假英日同盟之名義。驅逐德國勢力於山東。而代領之。又威迫中國訂二十一條之中日協約。事實上完全破壞中國獨立。與各國均勢之局。而獨占中國之優越地位。知爲列強所不願。而對中國提出最後通牒時。美國曾向日本宣言。謂如有侵害美國與中國條約上之權利。或侵害中國之獨立及領土。及列國工商業均等主義者。美國斷不承認。日本恐歐洲大戰結局以後。美國與列強聯合對付。則日本孤立無援。正屬危險。故自迫訂二十一條中日協約以後。其外交方鍼。急欲乘歐戰未了之先。使英、俄、法、美承認日本在中國之優越地位。以得此種保障。則以後對於中國何等自由行動。皆副產品耳。然此種政策。非美、英、法、三國所能承認。惟俄國政府。爲天然的侵略性質。與日本完全相同。又兩國在東亞之地位。亦頗相同。而俄國自與德、奧宣戰後。無東顧之暇。日本外

交方鍼。遂決定向俄表極端之好意。以達日俄聯盟之政策。迭向俄國政府聲明。凡俄國在東亞之軍力。可盡調赴歐西戰場備敵之用。日本對於俄屬之海參崴、樺太島、及北滿等處。不但不稍事侵略。且代任防護之責。並竭全國之力。接濟俄國之兵器及軍需品。使俄國於歐西戰爭時期無軍實缺乏之虞。俄政府以西方大敵當前。東方得此良友之幫助。感謝之情。自不能已。日本遂乘機倡日俄同盟之說。及袁世凱稱帝。中國抗袁運動將起全局之擾亂。日本大隈內閣欲乘機解決中國問題。日俄同盟之進行愈猛。適民國五年（西曆一千九百十六年）一月俄國克魯義大公因賀日皇登極至東京。日政府爲隆重之歡迎。而拒絕袁世凱之特使。特與俄國大公交換兩國同盟之意見。然俄國政府對此同盟。不甚熱心。日本朝野。則爲狂熱之運動。且表示凡有益於俄國者。日本賭國命幫助之。

而不惜。俄政府明知是計。而不便拒絕。蓋以爲承認日本之意旨。則俄國對於中國。雖有進取之地步。然日本所獲於中國者。遠甚於俄。若不承認日本之意旨。則日本可一時翻臉。北滿洲、海參崴、樺太島等處。或不久將落於日人之手。故比較以承認爲佳。縱日本獲於中國之權利。遠甚於俄。然慷他人之慨。於俄無損。此俄政府終贊成日俄同盟之所由也。是年七月三日。兩國政府發表日俄之新協約如左。

日本政府及俄國政府。爲極力維持極東永久之和平協定如左。

一 日本不爲敵對俄國之何等政治協定。亦不與他國聯合以當俄國。俄國不爲敵對日本之何等政治協定。亦不與他國聯合以當日本。二 兩締約國之一方。在極東之領土權及特殊利益。爲他一方面所承認者。如被侵迫時。日、俄、兩國應協商防護此等權利利益。應取之手。

段。

此協約之性質。謂爲同盟。尙有未當。因未規定協同戰鬥之明文與出兵之義務也。然其關繫與影響。則中國之天地。忽然變色。蓋自民國四年五月二十一條之結果。所謂中日協約。雖已破壞中國之獨立與領土保全。又破壞均勢均等之局。然不過爲日本之單獨行動。其與中國有關繫諸國。尙未共同一致承認之也。茲則歐亞之俄日兩陸軍國。結爲一體。明白破壞亞東之現狀。並明白宣布中國之權利利益爲日俄兩國之所壟斷。則二十一條中日協約。日本所得之權利。爲俄國之所承認無疑也。且此協約第二條。甲方承認乙方在極東之領土及特殊利益一語。爲毫無限制。非同一千九百年之日俄協約。僅規定以滿洲與日俄兩國之條約。又日俄二國與中國條約爲範圍者比也。又該約規定被侵迫時。兩國

協議應取之手段。則非同民國元年日俄第二次密約。僅規定互相援助不相牽制者比也。按民國元年日俄第二次密約。劃南滿、東蒙、爲日本所有。劃北滿、外蒙、爲俄所有。互約不相牽制。其結果。不旋踵而俄蒙協約成立。外蒙古變爲俄國之保護地。日本亦旋向中國要求滿、蒙、五鐵路權。其中三綫完全屬於東蒙。及民國四年。二十一條之交涉。日本要求東蒙與南滿並論。事實上。東蒙變成南滿。此僅由日、俄、二國不互相牽制。其結果。中國之損害。已至如斯。今此協約。兩國互相承認。既無範圍。又無協商對付被侵迫之手段。則勢之所及。中國寧有完膚。故曰。此協約成立。中國之天地變色也。

且本協約之外。另有密約。據當時日本各新聞所載。有謂日本接濟俄國之軍實。俄國以北蒙鐵道權及松花江之航行權讓與日本爲報酬者。

有謂上述協約第二條。兩締約國在極東之領土權。殊未指明。另以密約劃清兩國在中國之新領土者。當時吾人以爲前者。無秘密之必要。後者。近是。及民國六年（一千九百十七年）十二月。俄國革命後。勞農新政府反對專制帝政時之侵略政策。所有舊政府與各國訂結之條約。其帶侵略性質者。一概宣告無效。當時宣布一千九百十六年七月三日。俄日密約之全文如左。

俄羅斯帝國政府與日本帝國政府。爲助厚兩國之真實友誼起見。除經過一千九百零七年七月三十日。一千九百一十年七月四日。一千九百一十二年七月八日。各密約外。特以下列各款。再締補充上述各密約之新條約。

【吾人僅知一千九百一十年與一千九百一十二年之兩種密約

據此。則一千九百零七年已有密約矣。

一、俄日兩國互相承認在中國之權利利益。苟第三國對於日本或俄羅斯懷敵意。而欲於中國得政治上之優越權時。俄日兩國應坦懷協議。執行共同必要之手段。

二、依前款。俄日兩國取必要手段之結果。如第三國對於日本或俄羅斯竟至於宣戰之時。則他一方面締盟國應即實行援助。並約定非得兩締盟國互相之承認。不得與敵國媾和。

三、俄日兩國關於武力互相援助之條件及援助之方法。由兩國當事者決定之。

四、兩締盟國之甲方於乙方與第三國開戰之時。非由乙方提請援助之保證。又程度上無以武力援助之必要時。則甲方不盡第二條武

力援助之義務。

五、本條約自調印之日起。五年間有效力。若期滿之前十二個月。兩締盟國皆不照會廢約。則本約以締盟國一方表示廢約之日起。仍繼續一年有效。

六、本條約除兩締盟國外。互相嚴守秘密。

此密約第一語。兩國互相承認在中國之權利利益。即上述協約第二條雙方承認在極東之領土權。及特殊利益之換文耳。而毫無限制。則一條約僅規定被侵略時。兩國可取共同防敵之手段。尙不說到他一方實行助戰。密約則規定取共同必要之手段。有一方與第三國宣戰時。他一方則實行援助。蓋即實際之防禦同盟耳。按日本取得二十一條之中日協約後。其於中國已占得優越地位。恐他國因此有敵對日本之事。故



誘俄國爲此防禦同盟。以爲抵制。按其時。英、法、二國以歐戰之疲。無敵對日本之力。日本亦毫無畏懼英、法之意。此同盟對抗之目的。實美國也。美國於日本向中國提最後通牒時。曾有嚴重之宣言。日本防患未然。與俄國爲此結合。卽效一千九百一十年因美國提議滿洲鐵道中立。卽爲日俄協約以抵禦美國之故智也。儻其時美國不知日俄有此密約。而對日本爲實際之干涉。則日本勢必要求俄國執行密約之義務。以歐、亞、兩大陸軍國與美國對抗。美國自不易於東亞得如何之勝利。其結果。中國之土地。惟日、俄、二國壟斷吞噬而已矣。又假使竟無第三國敢出而干涉。則日本於此密約之前。尙向中國爲二十一條之要求。今既有此防禦同盟。則恃其無限制互相承認在中國權利利益之約束。更向中國肆行其侵害壓迫無疑也。則其結果。中國亦惟日、俄、二國壟斷吞噬而已矣。故此密

約之結果。無論如何。皆足以制中國之死命而有餘。則直認爲覆滅中國之秘密同盟可耳。幸而日俄同盟之次年二月。俄羅斯忽起掀天動地之大革命。專制帝胄滅亡。民主共和代興。李寧新政府舉帝制時代對內專制。對外侵略之政策。一概排斥。所有俄皇舊政府與各國締結之條約。凡涵侵畧性質者。皆在翻案之中。於是震動一時之日俄同盟。日俄密約。在俄國一方。完全宣告無效。日本欲俄國仍履行協約與密約之責任。殆猶夢想。此誠日本意外之打擊。而中國意外之徼倖也。

關於數次日俄同盟。當時有一重要問題。卽日俄同盟之時。日本亦商之於英國否乎。英國亦承認之否乎。此關係東亞外交變化之重要問題也。蓋此次日俄同盟之性質。與日英同盟第二項目的。卽保全中國之獨立及領土。又確保列國對於中國之商工業機會均等主義。全相違戾。且

日英同盟第三條規定。兩締盟國非與他一方面協議。不得與第三國結妨害本條約之別約。茲日本既與俄國結妨害日英同盟之別約。其不得不事先與英國協議無疑也。如不得英國之承認。則日俄協約不能發表。如得英國之承認。則日英同盟已等於零。此間英日兩國必另有一種秘密約束。為英國承認日俄協約之條件。當然不外日本慫恿英國向中國為何等之進取。以保全日英同盟一部分之存在。觀於英人為西藏劃界。必欲包四川西部。雲南西北部。及青海等處。皆劃入西藏範圍。日本輿論贊助之。即可以知其大略。要之自日俄戰爭以來。中國問題為日俄英三國所包辦。而以日本為主動力。幾次對中國之日俄協約。皆為日本所發起。而皆得英國之贊許。坐享同等之利益。若不得英國之贊許。並不令其得同等利益。則非日本之所敢為。蓋日英同盟之關係然也。故幾次日俄

協約。當然得英國之承認。惟此次日俄協約則似非英國所知。而爲日本賣同盟國之行爲。歐戰之後。英人決心取消日英同盟。此其大原因也。

### 三 白俄赤俄之誘蒙古蒙

民國二年十一月五日。中俄兩國所訂關於外蒙古聲明文件與聲明另件。規定兩國在外蒙古之利益。暨因時勢之發生各種問題。另行商訂。外蒙古亦得參與其事。如十六章所述。因此民國三年。袁世凱派畢桂芳、陳錄、與俄羅斯駐庫倫總領事亞歷山大密勒爾及外蒙委員會議於恰克圖。自同年九月起。至民國四年六月七日止。共九閱月。經四十八次會議。始締結下列之中俄蒙協約。

一、外蒙古承認民國二年十一月五日之中俄聲明文件及聲明附件。

二、外蒙古承認中國之宗主權。中俄兩國承認外蒙古之自治。與爲中國領土之一部分。

三、自治外蒙古。無與各外國締結關係於政治、土地、國際條約之權。

凡關於外蒙古之政治及領土問題。中國政府擔任照民國二年十一月五日中俄照會第二條辦理。

四、外蒙古博克多哲布尊丹巴呼圖克圖汗之名號。由中華民國大總統

統册封之。外蒙古公事文件。用民國年曆。但得並用蒙古千支紀年。

五、按照民國二年十一月五日中俄協約第三條。中俄兩國承認外蒙古自治官府。辦理一切內政。關於自治外蒙古商工事宜。有與各外國訂立國際條約之權。

六、按照中俄條約第三條。中俄兩國擔任不干涉外蒙古現有自治內

政之制度。

七、中俄條約第三條所規定中國駐庫倫之大員。其衛隊不得過二百名。該大員之佐理專員。分據於烏里雅蘇臺、科布多、及恰克圖各處者。每處衛隊不得過五十名。若因外蒙古自治官府之同意。於外蒙古他處添設佐理專員時。每處衛隊不得過五十名。

八、俄國駐庫倫代表之領事。其衛隊不得過五十名。其他處已設或將來得外蒙古自治官府同意添設之領署或副署。每處衛隊不得過五十名。

九、凡有典禮及正式集會之際。駐庫倫之中國大員。應列最高地位。若必要時。該大員有獨見哲布尊丹巴之權。俄國代表。亦有獨見權。

十、駐庫倫中國大員。及本約第七條所指各地之佐理專員。得行使最

高之監察權。俾外蒙古自治官府及其屬吏之行爲。不違犯中國宗主各權利。及中國國家與人民在外蒙古之各利益。

十一、自治外蒙古之區域。按照民國二年十一月五日。中俄聲明另件第四條之規定。卽以歷來庫倫辦事大臣、烏里雅蘇臺將軍、科布多參贊大臣。所管轄三區域爲限。

其與中國之界綫。以喀爾喀四盟。及科布多所屬爲界。卽東以呼倫貝爾。南以內蒙古。西南以新疆省之戈壁。西以阿爾泰接界之各蒙旗爲界。至中國與自治外蒙古之正式劃界。另由中俄兩國及自治外蒙古之代表協同辦理。並於本約調印後。二年以內。卽着手共同測量。

十二、中國商人。運入外蒙古之貨。無論何種產物。不課關稅。惟照自治

外蒙古人民遵照自治外蒙古官府所定內地貨捐一律納付。

自治外蒙古商民輸送貨物至中國內地時。與中國商民一律納付。已設及將來添設之各項貨捐。若係轉輸外國貨物。則照一千八百八十一年。陸路通商條例納稅。

十三、在自治外蒙古之中國人民。刑、訴訟。由駐庫倫之中國大員及駐外蒙古各地之佐理專員。審理判決。

十四、自治外蒙古人。與中國人民之民。刑、訴訟。均由駐庫倫之中國大員。或所派代表。或處各地之佐理專員。會同自治外蒙古官吏。審理判決。若華人爲被告。則在中國官員之處。會同審理。若蒙人爲被告。則在外蒙古衙門。會同審理。犯罪者。按各自之法律治罪。

十五、自治外蒙古人民。與俄國人民之民。刑、訴訟。按照一千九百十



二年（民國九年）十二月二十一日。俄蒙商務專條第十六款辦理。十六、在自治外蒙古華、俄、人民之民、刑、訴訟。若俄人爲原告。華人爲被告。俄國領事或所派代表。得參加會審。與中國大員或所派代表或佐理員。有同等之權利。其審訊被告之中國人。或中國證人。經中國官員間接審訊。俄領事或代表。於審查證據。追求賠償。認爲必要時。得令監定人聲明兩造之權利。並與中國官員會同擬定判決辭。記名簽押。中國官員。有執行判決之義務。若俄人爲被告。華人爲原告。中國駐庫大員或代表或佐理員得至俄領事館觀審。

十七、恰克圖、庫倫、張家口、間之電綫。以在自治外蒙古境內之故。議定爲自治外蒙古之完全所有物。

十八、庫倫及恰克圖蒙古之中國郵政機關。仍照舊保存。

十九、中國駐庫倫之大員。及駐烏里雅蘇臺、科布多、恰克圖之佐理員。及屬員等。由外蒙古自治官府。供給必要之駐所。完全爲中國政府所有物。並爲該大員等之衛隊。於其附近。讓與必要之地。

二十、中國駐外蒙古之各官員。使用外蒙古臺站時。照一千九百二十一年十月二十一日之俄蒙商務專條第十一款辦理。

二十一、一千九百十三年十一月五日之中俄聲明文件及附件。暨一千九百十二年十月二十一日俄蒙商務專條。繼續有效。

此約以民國二年十一月五日之中俄聲明文件。及附件爲根據。中國所爭得者。除衛隊比俄國多數十名外。其餘爲冊封尊號用民國年曆。及典禮位置之虛儀。此則爲中國宗主權利之範圍所在。民刑訴訟一節。中國不能與俄國平等。而外蒙古反與中國平等。尤爲該約之恥辱。至外蒙

古則依此約確定完全之自治制度。並有權與各外國締定商、工業之國際條約。則當然爲大半獨立之國家。况商、工業範圍原無一定限制。實與政治權利絕對不能分開。以外蒙古官府之愚闇。與中國宗主權之微弱。而有此等條文規定。則當然爲俄國留進取之地步。民國五年。元逆袁世凱因盜國而敗亡。國會恢復後。俄國政府要求中國國會中取消外蒙古之議員。其視本約與民國二年中俄聲明附件所規定。外蒙古爲中國領土之一部分爲具文。已毫無顧忌之明顯暴露。

上述條約之外。俄國政府更要求袁政府。於同年十一月六日。另締關於呼倫貝爾改爲特別地域之約。呼倫貝爾爲黑龍江省西部之呼倫道。清代曾置呼倫、臚濱兩府。富於森林鑛產。爲中東鐵道經過地。俄人於此置停車場。設新街布。所有森林鑛鈔。全爲俄商壟斷。宣統三年。俄人煽惑

外蒙古獨立時。嗾令呼倫貝爾之蒙人。亦宣布獨立。至此更正式要挾賣國的袁政府承認呼倫貝爾爲特別地域。訂立協約之要點如左。

一、呼倫貝爾爲特別地域。直屬於中華民國中央政府。

二、呼倫貝爾副都統。由大總統擇該地三品以上之蒙員。直接任命。與省長有同等權利。

三、都統衙門。設左右兩廳廳長。由副都統擇該地四品以上之蒙員。請中央任命。

四、呼倫貝爾之軍隊。全以本地之民兵組織之。若遇變亂。不能平定時。中國政府須先通知俄羅斯政府。得派遣軍隊赴援。但秩序回復後。卽須撤回。

五、呼倫貝爾各種稅捐之收入。及其他地方歲入。皆充作地方經費。

六、呼倫貝爾之土地。爲同地人民共有財產。中國人僅取得借地權而止。並由該地官憲認爲與該地人民之牧畜無障礙爲限。

七、呼倫貝爾將來敷設鐵路。儘先與俄羅斯借款。

八、俄羅斯企業家。與呼倫貝爾官憲締結條約。經中俄兩國委員之審察者。中國政府應即承認之。

原呼倫道爲我國內地。與外蒙古截然不同。乃改爲特別區域。令主權大受限制。且予俄國以特種權利。此俄國令外蒙古獨立外。又將我龍江省內部。劃一緩衝區域。實至可紀念之事也。以上兩約。皆係一千九百十五年所訂結。即俄帝國政府對德奧開戰之次年。其時俄帝國政府尙未陵夷。故猶積極的對華侵畧。過此以後。俄國國勢大生變化。而外蒙古與呼倫貝爾之形勢。亦因之大爲轉移。蓋中華民國六年。即一千九百十七

年三月。俄國起空前之大革命。羅馬諾夫皇室滅亡。蘇維埃聯邦政府成立。全反對帝制時代之侵略主義。凡舊政府與他國締結涵侵略性質之條約。一概宣告無效。所有外蒙古自治與呼倫貝爾之約束。皆在無效之列。因此外蒙古王公喇嘛大失所望。初。俄帝國政府。連動外蒙古獨立時。贈活佛二百萬盧布。其他王公喇嘛。亦各有重餽。並許外蒙古獨立後。俄國可以供予巨款。爲外蒙古獨立建設費。王公大喜。此當時欣然獨立之重大原因也。然彼等毫無理財知識。亦無一定之收入。自民國元年至五年。共借俄款。約三千萬盧布。全供浪費。不爲整理收入之用。及俄國革命。新俄不再予借款。外蒙古財政陷於非常困難。不但行政費無着。活佛王公且幾無法自給。以視內蒙古王公。受民國之優待。不勝欣慕。民國七年。俄國過激派勢力。漸張於西伯利亞。外蒙古毫無兵備。大受希里雅特兵

匪之侵迫。甚爲惶懼。王公喇嘛始知外蒙古斷無自治能力。非仰仗中國保護不可。迭懇請北政府出兵防禦。值協約國共同出兵西伯利亞。中日軍事協定有中國軍隊由庫倫進至貝加爾方面之規定。於是邊防軍之一部。進入庫倫。外蒙古被俄匪侵擾之禍。雖得少免。但財政問題仍無法解決。王公喇嘛乃有取消自治。還政中央之議決。活佛贊成之。商由庫倫都護使陳毅照前清舊制。擬定優待條件。及善後辦法。密呈中央核奪。時徐樹錚任西北籌邊使兼西北邊防總司令。主張積極的改革政策。欲以籌邊使之職權。統轄全蒙。而主持其一切行政。然活佛王公認徐樹錚爲統監政治。滿懷不願。經國務院、蒙藏院切實審量。以陳毅之辦法爲妥當。密電陳毅轉告活佛王公。謂政府斷無以徐樹錚爲總監之意。可勿猜疑。活佛王公乃於民國八年十一月七日。以請願之形勢。懇請大總統准其

取消自治。並請取消關於外蒙古自治之中俄蒙一切條約。請願書如下。

竊外蒙自前清康熙以來。即隸屬中國。噶噶向化。二百餘年。上自王公。下至庶民。均各安居無事。自道光年間。變更舊制。有拂衆情。遂生嫌怨。前清末年。行政官吏污穢。衆心亦懷惡怨。外人乘隙煽惑。遂肇獨立之舉。嗣經訂定條約。外蒙自治告成。然迄今數年。未見完全效果。近聞俄國。內亂無秩。不能統一屬地。自無保護條約之能力。而布里奴繪等。任意勾通土匪。結黨糾衆。迭派人到庫。催逼歸從。擬統一全蒙。獨立爲國。種種煽惑。形甚迫切。且唐努烏梁海向爲外蒙所屬區域。始則俄之白黨。強行侵占。繼則紅黨復進。外蒙人民生計。向來薄弱。財政困難。匪可言喻。加以此等外患。實在無法辦理。本官府召集王公喇嘛等。屢開會議。咸謂近來中蒙感情敦篤。嫌怨盡泯。均各情願取消自治。仍復前清



舊制。凡於札薩克之權。仍行直接中央。所有平治內政。防禦外患。均賴中央極力扶救。業經博克多哲布尊丹巴呼圖克圖汗之贊成。惟期中央關於外蒙內部權限。均照內地情形。持平議訂。於中央統一權。亦不抵觸。自與蒙情相合。亦於國家有益。是我外蒙官民。所共祈禱者也。至前訂中俄蒙三方條約。及俄蒙商務專條。並中俄聲明文件。原爲外蒙自治之所締結。今既自己情願取消自治。所有前訂各條約。當然概無效力。其俄人在蒙營商事宜。將來新俄統一政府成立後。應由中央負責。另行議訂。以篤邦誼。而挽權利。所有王公喇嘛等聯名請願。取消自治官府。恢復前清舊制。期望優待緣由。理合具呈請願。伏乞大總統鑒核。恩准訓示。不勝迫切待命之至。

時。徐世昌據北政府。卽於十一月二十二日下令。准如所請。所有外蒙

古博克多哲布尊丹巴呼圖克圖汗應受之尊崇。以及四盟沙畢等應享之利益。一如舊制。中央並應優爲待遇。俾共享共和幸福。以垂無窮等語。同日加封活佛爲外蒙古翊善輔仁博克多哲布尊丹巴呼圖克圖汗。特任徐樹錚爲册封專使。並明令責成徐樹錚以西北籌邊使。督辦外蒙古善後一切事宜。同時呼倫貝爾副都統貴福承全旗官吏。及蒙民全體之意。呈請東三省巡閱使張作霖。與黑龍江督軍孫烈臣。轉請中央取消特別地域及關於呼倫貝爾之中俄協約。北政府亦卽頒令。准如所請。自是外蒙古與呼倫貝爾完全恢復前清時之原狀。當時外交部將此情形通告外交團。日、英、二國亦不能持民國二年密約有所異議。惟俄公使庫遠撮夫以中國政府不徵求俄之國同意。而取消外蒙古自治與呼倫貝爾特別地域爲破壞中俄條約。提出抗議。北政府拒絕之。因此我國之外蒙

古問題。自清宣統三年。外蒙古受俄帝國政府之誘惑。一時與母國脫離關繫。至此八九年之久。乃得恢復舊狀。

但事實殊不如此簡單。外蒙古自民國八年十一月。取消獨立。還政中央後。不及一年。而外蒙古之禍又作。卒於民國十年二月。又宣布獨立。此間有二大原因。一爲北政府誤任徐樹錚督辦外蒙古善後。一爲日本積極經營外蒙古之所致。蓋徐樹錚始欲以籌邊使職權統轄全蒙。主持其一切行政。及中央責成督辦外蒙古善後事宜。徐氏對於活佛王公之威勢儀仗。全與統監無殊。威燄逼人。爲外蒙古所深惡。而實際上。徐志在爭中央政權。而不在經營邊務。欲假邊防軍除國內異己之勢力。不在防外蒙古之奸宄。故關於外蒙古邊政。凡實業、交通之改善與設施。毫無計劃。即所有邊防軍三師四混成旅之多。亦僅以少數兵隊。留駐外蒙古。其大

多權之邊防軍。盡駐屯於北京附近各省之重要地點。以謀與直軍對抗。及民國九年七月。直、皖兩軍鏖戰之結果。邊防軍一敗塗地。北政府對於督辦外蒙古善後事宜之西北籌邊使。以內亂罪。明令拏辦。中央命官變成此等局勢。大啓外蒙古輕侮中央之心。重以邊防軍被解散之後。駐外蒙古之軍隊各懷疑懼。又軍餉欠發。兵心解體。而俄黨蒙匪乘之。此由於北政府錯任徐樹錚督辦外蒙古善後。以讓成蒙禍之情形也。

自俄國革命。宣布一切密約無效。爲日本之所痛心。乃決扶助俄國帝制派之勢力。以與勞農政府對抗。除乘機占領俄國沿海洲外。並欲將俄國舊政府在中國北滿洲、外蒙古一切權利。由俄國帝制派之手。讓渡於日本。關於此事。日本於出兵西伯利亞後。其對沃木斯克舊俄政府。最高主權之高爾哲氏及俄舊黨將領謝米諾夫氏。予種種之援助。皆訂有將

來讓渡俄國在滿蒙一切權利之密約。又一方直接經營外蒙古。民國七年五月十六日。日本齋藤季次郎與中國委員長靳雲鵬所訂陸軍軍事協定細目。其第一、第四兩款。皆有日本軍隊一部得由庫倫進貝加爾之規定。此即日本取得堂堂正正經營外蒙古之徑路也。自此日本軍官策士得發揮其運用蒙古王公及聯絡蒙匪之本能。民國八年。外蒙古忽然消取獨立。還政中央。爲日本所不樂。迺定積極擾亂外蒙古之策略。着着實行。其時。俄國舊黨高爾哲及謝米諾夫之勢力。雖被遠東共和政府完全攻破。無復立足之地。然日本聯絡謝匪。着着奏效。民國九年九月。日本仍招謝米諾夫至大連。協議仍由日本供給款械。令其殘部與蒙匪結合。攻取外蒙古爲根據地。遂肇民國十年二月。謝米諾夫部將恩琴與蒙匪合力。攻陷庫倫之事。爲此日本經營外蒙古以演成蒙禍之實情也。

當直皖兩軍開戰之後。蒙匪猖獗愈熾。迭經鎮撫使陳毅、旅長褚其祥電請中央增援兵。斯時直奉兩方之實力派。視援庫倫之問題小。而視爭奪援庫總司令地位之問題大。迭經遴選。始派定張景惠爲援庫總司令。然數月之久。不出一兵赴援地。至民國十年二月。俄將恩琴率同俄、蒙、兵匪四、五千人。三面突攻庫倫。褚旅高團皆大敗潰師。陳毅僅以身免。奔赤塔。自此恰克圖、叻林、烏得、各地。西至科布多相繼陷落。而所謂援庫軍者。始終不遣一兵赴援。於是外蒙古爲俄白黨所占領。此中最可注意者。據戰地軍事報告。蒙匪之指揮官。全係日本軍官。不下六七十人之多。

外蒙古既被俄白黨占領。實予遠東共和國以重大之危險。蓋遠東共和國首都設於赤塔。距庫倫甚近。而俄白黨以外蒙古爲根據地。足以斷絕遠東共和國與蘇維埃祖國之關繫。且危迫西伯利亞也。故其時遠東

共和國。一面抗議中國政府。扶助白黨。危害蘇俄。一面逕行出兵外蒙古。與白黨俄蒙匪徒開戰。結果。白黨敗走。蒙匪逃散。日本亦不便明目張膽出兵援助。於是外蒙古轉爲赤俄軍隊占領。並與外蒙古訂約。承認其爲獨立國。民國十一、二年間。我政府雖屢要求撤兵。而俄國代表。優林、越飛等。皆主張外蒙古撤兵問題應與中俄兩國全體懸案一併解決。不能先撤蘇俄駐外蒙古之兵隊。迄至民國十三年中俄會議幾至決裂。尙因此問題之牽涉而然。

### 第三章 中俄復交與中俄協定

#### 一 東路權及哈市政權之收回

歐戰未發生之前。駐哈爾濱之俄羅斯軍隊。共約三萬人。警備中東鐵路與哈爾濱至長春鐵路之俄軍則約六萬人。俄與德奧宣戰以後。此項俄軍。大多開赴於歐西戰場。其殘留北滿之部隊。自俄國革命後。分爲新舊兩派。屢起衝突。不能融洽。至民國六年冬。衝突之形勢益急。哈爾濱總領事兼中東鐵路督辦霍爾哇拖係舊黨首領。失其統轄能力。至不能維持秩序。吉林地方官恐釀成變亂。由師長高士儻於民國七年一月十日率軍圍俄營。迫令解除武裝。由霍爾哇拖將亂兵送回俄境。所有中東鐵路與哈爾濱至長春鐵路之守備。改由中國軍隊負責。自是俄國北滿鐵



路守備權爲中國收回。同年各國共同出兵西伯利亞。設聯合國鐵路委員會。協議將中東、西伯利亞、烏蘇里、三鐵路由各國共同管理。當經中國政府正式反對。謂中東鐵路原係中俄兩國合辦。現中國爲參戰之一員。且富有保持該路秩序之能力。該路應歸中國管理。但以俄國白黨與日本之反對。聯合會僅承認中東路守備權歸於中國而止。

先是中東鐵路俄督辦霍爾哇拖於光緒三十二年主張東清鐵路會社於哈爾濱有行政權。施布東清鐵路市制於哈爾濱。清廷不得已。於宣統元年與訂東清鐵路附屬會地組織自治會協約十八條。規定中國交涉總辦與俄國鐵路督辦有監督檢查自治會之權。然以霍爾哇拖之跋扈。與中國官吏之萎靡。哈爾濱之行政權。竟完全旁落於中東鐵路俄督辦之手。迄俄國革命後猶然。及民國七年。我國收回中東鐵路守備權後。

政府添派中東鐵路督辦一員。卽以吉林督軍鮑貴卿任之。自是中東鐵路管理權與附屬地行政權。事實上爲中俄二國所共有。及民國九年三月十一日。爲俄國革命三週年紀念日。中東鐵路之俄國從業員。殆全表同情於西伯利亞之遠東共和政府。而以鐵路督辦霍爾哇拖係帝制餘孽。且屢利用中東路附屬地之行政權與警察權。予新黨以不利。迺謀於紀念日起革命運動。當經中國軍警干涉。不果行。遂改由全體致函霍爾哇拖。要求於二十四時之內。將中東路附屬地行政權讓渡於海參崴臨時政府代表之手。霍爾哇拖拒絕之。遂惹起全體同盟罷工。東省當局迭經審議。由吉督兼中東路督辦鮑貴卿一方派重兵鎮壓工人。一方勸霍爾哇拖解除職務。以維路政。霍氏不得已。去職。當時鮑貴卿發表一布告。略謂。中東鐵路沿線地帶原爲中國之領土。曾再三訓告。不得紊亂地方。

安寧秩序在案。然霍爾哇拖屢利用軍警。行利於己派之政略。致惹起俄羅斯勞工同盟罷業。本督軍爲確保中國主權與鐵路秩序起見。勸霍爾哇拖解除職務。以維路政。嗣後路事取決於董事會。以示公開。無論俄國個人或團體皆不許以政治目的干涉路事。俟將來俄國統一後。中俄間再訂辦法。此布告宣布後。駐哈聯軍與各國領事皆無異議。美國尤表示滿意。自是。中東鐵路與哈爾濱主長春鐵路之管理權。與其附屬地（卽哈爾濱）之行政權。警察權。完全爲我國收回。

此時曾起一意外問題。卽日本欲將俄國之中東路權不歸中國收回。而讓渡於日本是也。關於此事。日本之竭力援助謝米諾夫與高爾哲。皆秘密訂有讓渡中東路權與日本之交換條件。以謝高二氏皆失敗。約束無法履行。而又不能向中國明白要求。迺暗施其種種攫奪該路之陰謀。

當聯合國鐵路委員會議決中東路守備權歸於中國之時。日本司令官大谷氏即要求聯合會將中國之中東路守備隊歸日本節制。爲聯合國所拒絕。及鮑貴卿勸霍爾哇拖去職後。日本又主張以四國名義出而干涉。復爲各國所拒。日本乃將撤回貝加爾方面之軍隊。全體駐紮於北滿中東路沿綫之一帶。動與中國軍警爲難。適值我國取消俄國使領待遇。俄國舊黨恐我國接收華俄道勝銀行忽懸法旗以爲抵拒。我國政府恐惹起意外國際糾葛。於同年十月二日由部與華俄道勝銀行訂一管理東省鐵路續訂合同。其大要如左。

一、董事會九人。俄籍五人。華籍四人。以中國督辦爲會長。遇票數平均時。會長有加投一票之權。但董事會以七人爲取決之多數。亦必有督辦會辦到席。方爲有效。

一、添設中俄幫辦、會辦、各一人。添設副局長華員一人。會計、營業、工程、保路、四處均添副處長華員一人。

一、中國所存道勝銀行之款。以鐵路債券交付中國政府。

一、公司以後所有權利職務。均限於商業範圍以內。不得涉及政治。中國政府得隨時嚴重取締之。

一、中國政府暫時代替俄國政府執行保護管理及實行各條約合同之一切職權。此項代行職權之期限。以中國政府正式承認俄國政府並彼此商定該路辦法後爲止。

此合同雖有可議之點。然以我國收回中東鐵路與哈爾濱市、長春鐵路之管理權論。法律上增一重保障。亦未始非計之得也。二十五年以來。俄羅斯帝國主義者侵略中國之主幹事業。卽爲中東鐵路。至此乃完全

## 由中國收回。

### 二 俄租界及治外法權之收回

自俄國國體改革之後。其以前俄羅斯皇室政府所派出之公使。已不能爲新俄之代表。按國際慣例。駐在國政府因其失去代表資格。可以停止其公使待遇。若停止待遇。於本國不利益時。則不停止亦可。蓋全以駐在國之利害爲標準也。協約各國對於此等俄使。有早已取消使節待遇者。亦有仍舊不變者。如日本與俄國舊政府有種種密約。以扶持彼此侵略中國之政策。新俄政府則反對此政策。故日本爲本國利益計。方設法扶持俄國舊黨之勢力。以與新俄對抗。當然不停止舊俄使之待遇。我國則不然。凡俄國舊黨勢力得維持於遠東。以與外國狼狽爲奸。實爲我國

重大之憂患。關於新俄之過激主義與承認問題。雖應與各國一致。但俄使待遇問題。則應以本國之利害爲依歸。不必與他國從同也。乃俄國於民國六年三月革命。我國於同年八月對德奧宣戰。各國對於吾國希望條件。允許庚子賠款五年延期。惟俄國公使庫達攝夫氏祇許俄國賠款年額三分之一延期。其餘三分之二均由中國按期交付俄使之手。夫庚子賠款惟俄國特多。年額亦惟俄國特大。斯時舊俄政府早已滅亡。新俄政府已經宣言。凡舊政府與他國訂締之不公平之條約。一概取消。乃我國尙承認按期交付庚子賠款三分之二。與不能代表俄國任何物事之舊公使。可謂其愚不可及。及民國八年十一月以後。勞農政府之紅軍以破竹之勢。顛覆沃木斯克之全俄政府。旋統一東部西伯利亞各地方政團。組織遠東共和國。立國都於赤塔。於民國九年七月派全權代表優林

來北京。以取消舊政府壓迫中國之約章。另結兩國公平待遇之通商條約爲職志。並宣言前皇室政府所派之公使領事。已非新俄之代表。其所辦之事。新俄政府不負責任。由是我國政府乃感俄使待遇問題之困難。一則交付之賠款。將來新俄政府是否承認。二則事實上遠東共和國已另派代表來北京。三則屢發現俄使與舊黨擾亂中東路之陰謀。而調查各國多已取消其使節待遇。乃決心倣照辦理。一面停止交付賠款。一面禁止俄使發密電。俄使抗議時。外交總長顏惠慶面告之曰。貴使早已不能代表俄國任何事物。反令倣國政府極受困難。若貴使自行辭去公使資格。最爲適當。俄使反抗謂旅華俄僑有三十萬人之多。不能卸責。自是外部與俄使斷絕關繫。九月二十三日。由大總統發表停止俄國使領待遇之明令如下。



據外交部呈稱。比年以來。俄國戰團林立。黨派分歧。統一民意政府迄未組成。該國駐華使領等官。久已失其代表國家之資格。無由繼續履行其負責之任務。曾將此意面告俄使。應請即日明令宣布。將現在駐華之俄國公使領事等停止待遇等語。查原呈所稱各節。自屬實情。惟念中俄兩國。壤地密邇。睦誼素敦。現雖將該使領等停止待遇。而中國對俄國人民固友好如初。凡僑居我國安分俄民。及其生命財產。自應照舊切實保護。對於該國內部政爭。仍守中立。並視協商國之趨勢爲準。至關於俄國租界及中東鐵路用地。以及各地方僑居之俄國人民。一切應由主管各部及各省區長官妥籌辦理。此令。

外交部將此令照會俄使。俄使旋覆文反抗。並訴諸外交團。以鳴冤。我國政府乃爲非公式辯明。大致謂。中俄各項條約。皆係前俄統一政府所

締結。今局勢變遷。無復效力可言。中國爲保持本國主權及俄國利益起見。不得不取相當之處置。至保護俄僑。自當負完全責任。駐京各國公使皆請訓本國政府。問對付此問題之態度。各國政府以中國此舉。實援國際慣例與各國對俄先例皆無異辭。惟關於俄國財產處分一層。各國公使意欲干涉。我政府以中國並非與俄國斷絕國交。所有俄國財產當然由中國政府切實保護。除俄國公使館。依公使團要求。由辛丑和約關係各國公使保管外。當令各疆吏將俄國領事署接收關。於漢口天津之俄國租界。飭令各該地交涉員及警察廳同時接收管理。自此以後。所有俄僑之裁判權。及租界內一切行政事宜。統由中國收回。

### 三 中俄協定之締結

民國九年。遠東共和國派優林來北京。失敗後。翌年。蘇聯政府駐英代表加拉罕向中國駐英公使顧維鈞商請與中國恢復邦交。並稱奉本國政府訓令。願以俄國與英、德、意、瑞諸國所訂之商約爲標準。與中國訂約。願使以告外部。外部認可。並電莫斯科聲明。俄國須以一九一八年及一九一九年對於中國之宣言爲基礎。中國政府當與之接洽。蓋俄國自革命後。曾於一九一八年七月二十五日及一九一九年九月二十七日。向中國發表兩次宣言。大致如左。

前俄帝國政府與中國訂立之一切不平等條約、協約、議定、合同、等項。概行廢止。又前俄帝國政府與第三者所訂立關於中國之一切條約、協約、協定、等。有礙中國主權及利益者。概爲無效。中東鐵路、鑛產、森林、等權利。及從前俄國資本家所奪取中國之一切權利。無賠償。無報酬。

歸還中國。並拋棄一千九百年拳亂事件俄國部分之賠款。望中國從速與勞農共和政府另訂平等之新約。

當莫斯科發此宣言。正中國政府與協約各國對俄政策取一致之時。故對於此種重要宣言。並未理會。至此乃求俄國實踐前言。爲雙方接洽之條件。蘇聯政府乃於民國十二年一月派代表加拉罕來北京。中國政府派王正廷督辦中俄交涉事宜。自是中俄交涉開始。至十三年三月。雙方始擬定解決中俄懸案大綱協定及暫行管理中東鐵路協定各草案。王正廷呈報政府審核。經閣議討論。認有三點。仍須再加切商。

一、關於俄蒙協約之件。草案僅規定前俄帝國政府與第三者所訂各約有傷中國主權者廢止之。而於蘇俄與外蒙古所訂之約未聲明取消。查蘇俄與外蒙古所訂條約。係認外蒙古爲獨立國。外蒙古業

派使節駐俄。關係甚巨。

二、關於撤退駐外蒙古俄兵之件。草案規定一俟蒙古撤兵之條件卽限期制止白黨之辦法在會議中確定後。俄國始盡數撤兵。政府認爲俄兵入蒙。侵害中國主權。原則上應允卽行撤兵。不應附以條件。致將來轉生糾葛。

三、關於俄國教堂移轉之件。草案規定。俄國在中國境內教堂之不動產。須移交俄國政府接收。政府恐將來他國援例要求在內地置產。諸多窒礙。認爲欠妥。

以上三件。經開議議決。交由王正廷與加拉罕再商。王旋與加拉罕再議。皆未達到閣議之目的。竟於三月十四日。將草案簽字。政府不能照准。而俄代表以業經雙方簽字之約。不能再有更動。大起爭執。三月十六日。俄代

表致最後通牒性質之公函於王正廷。其文如下。

本月十四日午前。本代表以蘇聯政府名義。與貴督辦以中國政府名義。公同將兩國間恢復邦交之協定草案議定。並加簽註。相約俟該協定正稿繕竣。卽日簽字。頃聞該項議定草案。經中國政府議決。對於貴督辦所議定者。未予核准。並不允貴督辦正式簽字。爲此應請貴督辦注意者。本代表自本日起。限期三日。候中國政府在此期內承認雙方同意之協定。如過三日。本代表對於該協定所規定各節。不受何等拘束。再。本代表應以本國政府之名義向貴督辦聲明者。儻因雙方交涉決裂。協定破壞。而發生一切事項。本國政府認爲應由中國政府擔負完全責任。請轉達貴國政府。

王正廷以事情重大。當卽咨呈國務院。請照草約簽字。國務院認爲商

議尙未終了。王正廷並未奉政府訓令簽字。俄代表忽有有限期承認之來函。殊深詫異。責令王正廷仍本前次閣議決定之三點。再與俄代表磋商。同時俄代表正式致外交部以下列之照會。

上年三月二十八日。接准貴部知照。中國政府已派王正廷爲與蘇俄代表談判之正式代表。本年三月十四日與中國政府正式代表之談判完全告竣。所有各項協定業經簽字。同日。應將各該項協定謄清本。重行簽字。但中國政府不承認其正式代表簽字。致毀前項協定。茲蘇俄政府因上項情形。訓令本代表照知貴總長如左。

- 一、蘇俄政府認爲此次與中國政府正式代表之談判業經終了。
- 二、蘇俄政府堅決拒絕重行討論業已議定並簽字之各項協定。
- 三、蘇俄政府警告中國政府勿鑄成足以影響蘇俄與中國將來邦

交上不可補救之錯誤。

四、在本代表本年三月十六日致中國代表公函內所指定之期限屆滿時。蘇俄政府對於本年三月十四日所簽訂之協定各項不受其拘束。並保留將來與中國協定各項條約有自由訂立條件之完全權利。

五、在上述期限屆滿後。中國政府於無協定、無條件、與蘇俄政府恢復尋常正式邦交以前。不得與蘇俄政府重開談判。

此照會蓋完全宣告中俄交涉決裂。北京政府乃明令撤消督辦中俄交涉公署。所有中俄交涉事宜。責成外交部接收辦理。外交總長顧維鈞乃於三月二十二日覆蘇俄代表以下列之照會。

(上略) 所稱三月十六日致王督辦函內期限一層。尤難承認。查王



督辦之簽字草約。事前並未請示政府。故本國政府認爲商議並未終了。况去年十月二日中國政府給予王督辦之證書。載明祇有商議議決之權。將來議決事項如經政府准其簽字批准。定予施行。貴代表面稱當時並未閱看全權證書。如一檢閱。當不致有此舉動。故此項簽字。中國政府實未能承認。茲於本月二十日奉本國大總統令。中俄交涉關繫重要。王正廷籌辦以來。與俄代表雖漸融洽。而條款尙未確定。應責成外交部接收辦理此令。等因。本總長現已遵令準備與貴代表繼續商議。俾資結束。爲此略覆貴代表。並請轉達貴國政府爲荷。

俄代表接此照會。旋作憤懣冗長之辯駁書。致覆外交部。指摘中國對於此等空前良好之協約而不簽字。實受帝國主義之唆使。且聲明『正式代表簽定之預約。既可推翻。則繼續商議亦實無益。』中國新進派及

富有革命性之民衆。皆對加拉罕表同情。主張無條件承認蘇俄政府。願維鈞費無窮手續。加拉罕始承認非正式接洽。兩月間中俄交涉表面完全中止。實際則仍積極進行。國務院主張之三點。卒爲俄代表所容納。至五月三十一日。中俄協定忽然簽字發表。兩國邦交卽於是日宣告恢復。實爲中外人士所不及料。

### 中俄解決懸案大綱協定

第一條。本協定簽字後。兩締約國之平日使領。關繫應卽恢復。中國政府允設法將前俄使領館舍移交蘇聯政府。

第二條。兩締約國政府允於本協定簽字後一個月內。舉行會議。按照後列各條之規定。商訂一切懸案之詳細辦法。予以施行。此項詳細辦法。應從速完竣。但無論如何。至遲不得過自前

### 第三條。

項會議開始之日起六個月。

兩締約國政府同意在前條所定會議中，將中國政府與前俄帝國政府所締立之一切公約、條約、協定、議定、及合同等項，概行廢止。另本平等相互公平之原則。暨一九一九年與一九二零年蘇聯政府各宣言之精神，重訂條約、協約、協定、等項。

### 第四條。

蘇聯政府根據其政策及一九一九年與一九二零年之宣言，聲明前俄帝國政府與第三者所訂立之一切條約、協定、等項，有妨礙中國主權及利益者，概爲無效。締約兩國政府聲明，嗣後無論何方政府不訂立有損害對方締約國主權及利益之條約及協定。

第五條。

蘇聯政府承認外蒙古爲完全中華民國之一部分。及尊重在該領土內中國之主權。蘇聯政府聲明一俟有關撤退蘇聯政府駐外蒙古軍隊之問題。即撤兵期限。及彼此邊界安寧辦法。在本協定第二條所定會議中商定。即將蘇聯政府一切軍隊由外蒙古盡撤退。

第六條。

兩締約國政府互相擔任在各該國境內不准有爲圖謀以暴力反對對方政府而成立之各種機關或團體之存在及舉動。並允諾彼此不爲與對方國公共秩序社會組織相對之宣傳。

第七條。

兩締約國政府允在本協定第二條所定會議中彼此將疆界重行劃定。在疆界未行劃定以前。允仍維持現有疆界。

第八條。

兩締約國政府允將兩國邊界江湖及他種流域上之航行問題。按照平等相互之原則。在前條所定會議中規定之。

第九條。

兩締約國政府允在前條所定會議中。根據下開原則。將中東鐵路問題解決。

(一)

兩國政府聲明中東鐵路純係商業性質。並聲明除該路本身營業事務。直轄於該路外。所有關繫中國國家及地方主權之各項事務。如司法、民政、軍務、警務、市政、稅務、地畝、(除鐵路自用地皮外)等。概由中國官廳辦理。

(二)

蘇聯政府允諾中國以中國資本贖回中東路及該路所屬之一切財產。並允諾將該路一切股票債票移歸中國。

(三)

兩國政府允諾於本協定第二條所定會議中解決贖路之

款額及條件暨移交中東路之手續。

(四)

蘇聯政府擔任對於中東鐵路在一九一七年三月九日革命以前所有股東持債票者及債權人負一切完全責任。

(五)

兩國政府承認對於中東鐵路之前途。祇能由中俄兩國取決。不許第三者干涉。

(六)

兩國政府允在本案第三項所規定事項未經解決以前。特行規定暫行管理中東鐵路辦法。

(七)

在本協定第二條所定之會議未將中東鐵路各項事宜解決以前。兩國政府根據西曆一八九六年九月八日所訂中俄合辦東省鐵路合同所有之權利。與本協定及暫行管理中東鐵路協定暨中國主權不相抵觸者。仍爲有效。

第十條。

蘇聯政府允諾拋棄前俄政府在中國境內任何地方根據各種公約、條約、協定等所得之一切租界等等特權及特許。

第十一條。

蘇聯政府允諾拋棄俄國部分之庚子賠款。

第十二條。

蘇聯政府允諾取消法外法權及領事裁判權。

第十三條。

兩締約國政府允在本協定第二條所定之會議中訂立商約時，將兩締約國關稅稅則採取平等相互主義同時協定。

第十四條。

兩締約國允在前條所定之會議中討論賠償損失之要求。暫行管理中東鐵路協定。

中俄兩國因中東鐵路係由俄國國家出資，並完全建築在中國領土以內，彼此認定該鐵路純係商業性質。除本身營業事務外，所有關繫中國國家及地方主權之各項事務，概由中國官廳辦理。在本鐵路根

本辦法。未經在西曆一九二四年五月三十一日所訂中俄解決懸案大綱協定第二條所定之會議中解決以前。兩國爲共同經營本鐵路業務起見。同意規定暫行管理辦法。由兩國全權議定各條如左。

第一條。本鐵路設理事會。爲議決機關。置理事十人。由中俄兩國政府各選派理事五人組織之。中國政府派定華理事一人爲理事長。卽督辦。蘇俄政府派定俄理事一人爲副理事。卽會辦。理事會之法定人數。以七人爲至少之數。所有一切取決。須得六人以上之同意。方有執行之效力。

第二條。本鐵路設監事會。由監察五人組織之。華監察二人。由中國政府委派。俄監察三人。由蘇聯政府委派。會長由華監察選舉之。



第三條。本鐵路設局長一人。由俄人充任。副局長二人。華俄各一。均由理事會委派。由各該政府核准。

第四條。本鐵路之處長、副處長、由理事會委派之。如處長爲華人時、

副處長須爲俄人。處長爲俄人時、副處長須爲華人。

第五條。本鐵路各級人員。按照中俄兩國人民平等分配原則任用。

第六條。理事會商議路務不能解決時。呈報兩締約國政府解決。但

關於本協定第七條內所載之預算、決算、事項。不在此限。

第七條。本鐵路之預算、決算、由理事長提交理事會及監察會之聯

席會議核准。

第八條。本鐵路所有實利。由理事會保管。在本鐵路根本辦法未經

解決以前不得動用。

第九條。

理事會應將前俄政府於一八九六年十二月四日批准之中東鐵路公司章程。按照本協定及一九二四年五月三十一日所締中俄解決懸案大綱協定。從速改訂完竣。但無論如何。至遲不得過自理事會成立之日起六個月。

其未改訂完竣以前。該項章程與中俄解決懸案大綱協定不相抵觸暨不妨礙於中國主權者。仍繼續適用。

第十條。

將來中東鐵路根本辦法在一九二四年五月三十一日所訂中俄解決懸案大綱協定第二條所定之會議中解決時。本協定即行取消。

聲明書之重要者

(一)

中俄兩國政府聲明了解關於蘇聯政府實際上所有之俄國

教會房屋及地產其移轉或他項適當之處置。應在大綱協定第二條規定之會議中。按照中國內地置產現行法律及章程商定之。至俄羅斯政府實際上在北京及八大處所有之俄國教會房屋及地產等。一俟蘇聯政府指定接收之中國人或中國機關。中國政府即按照中國內地置產現行法律及章程設法移交之。

(二)

中俄兩國政府共同聲明關於大綱協定第四條雙方了解中國政府對於俄國自帝俄政府以來。凡與第三者所訂定之一切條約、協定、等等。其有妨礙中國主權及利益者。無論將來或現在。均不承認爲有效。

(三)

中俄兩國政府對於大綱協定第十一條共同聲明。雙方了解

如左。

- 一、蘇聯政府所拋棄俄國部分之庚子賠款。其所擔保之各種優先債務清償後。完全充作提倡中國教育款項之用。
- 二、設立一委員會管理並分配上述款項。該委員會以三人組織之。其二人由中國政府委派。其一人由蘇聯政府委派。該委員會議決事項。以全體一致行之。
- 三、該款於隨時收入時。應即存儲於上述特別委員所指定之銀行。

按前俄帝國政府依據各項不平等條約。獲得中國之種種權利。自一九一七年俄國革命之後。此種權利。事實上業由我國逐漸收回。已如上文所述。縱無此項協定。俄國亦無恢復其舊勢力之可能。但在法律上立

論我國取得收回此種權利之根據。實自本協定始。且我國一部外交史中之條約。其完全以相互平等之精神締結者。除一九二一年之中德協約外。此爲第二次之最平等條約也。

當中俄會議開始以來。法、日、美、三國知中俄兩方對於中東鐵路必有根本之協定。屢根據華盛頓會議之中東鐵路議決案。促中國政府注意。及中俄協定發表後。該三國又相繼對於大綱協定第九條關於中東鐵路不許第三者干涉。與俄國對債權人負責之點。表示抗議。日本並聲明保留日本在中東鐵路之權利等語。蓋自民國七年各國共同出兵西伯利亞。曾一度共同管理中東鐵路以後。各國假債權之關繫。欲組織財政整理委員會。以爲繼續之共管機關。華盛頓會議議決。該路將來由外交方法再議者。即指此項計劃而言。雖經中國代表在華會聲明保留自決

權。然各國迄未能忘情。故對於中俄協定第九條提出抗議。然我國以國權所關。當由外交部照覆各國。職明中俄兩國有完全處理中東鐵路之權。各國在中東鐵路之權利。應作爲普通債權債務之關繫。不能有干預中俄間之行動之行爲。故中國政府對於各國之主張。不應受其拘束。完全得由中國自主。

#### 四 大使之遣派

中俄協定成立之後。蘇聯政府乃派遣大使駐中國。六月十三日。蘇聯代表將本國政府此項訓令照會北京政府外交部。

本年五月三十一日。本國政府與中國政府簽訂之條約。實爲本國政府政策上之表示。此政策遠在一九一九年對於中國之宣言。即已聲

明。蓋完全以平等相互公正之原則爲基礎也。前俄帝政府常與他國一致。視中國爲不能享受完全權利之國。並以爲可以強迫使簽屈辱條約之國。故不以平等國相遇。而常派二等外交代表駐中國也。然中國有四萬萬人口之衆。現時在國際關係上又占極重要之地位。對於最近將來人類之發展。可預料其負有極大之責任。故中國目前雖覺困難。究不能謂爲無取得第一等國之價值。現在本國政府與亞洲各國發生之聯繫。業已廢棄其分別民族等級之原則爲基礎。因此亞洲各國現均派有大使駐莫斯科。而各國都城亦均接待本國大使。本國政府因上述理由。特以本國政府願在北京設立大使館及願中國在莫斯科設立大使館之意。由貴使卽行通告中國政府。

中國政府接此照會。再三審議之後。照覆俄代表表示中國政府之政

策亦確守平等相互公正之原則。甚歡迎彼此設置大使館之意。蘇聯政府旋派代表加拉罕爲駐中國特命全權大使。是爲外國對中國特派大使之始。

此事惹起北京外交團共同壓迫中、俄兩國之事實。卽俄國公使館問題也。先是中國政府取消俄國使領待遇時。照例俄國使館應由中國政府保管。然因辛丑條約使館界區由使團管理之故。公使團始則要求將俄國使館由前俄公使庫達攝夫管理。繼則由荷蘭公使代管。自中俄協定成立。其第一條規定中國政府允設法將前俄使領館舍移交蘇聯政府。故外交部於六月九日照會公使團。聲明中、俄邦交業經恢復。所有前俄使署及其附屬財產。應照中、俄協定交還蘇聯政府代表。希予答覆。公使團對於中、俄恢復邦交。多不滿意。而對於蘇聯派大使駐北京。尤所嫉



惡。蓋照國際慣例。駐在國公使團中。如有一大使。則一切共同外交事件。均應以大使爲首領。即使團會議。亦應推其爲主席。而各國多未承認蘇聯。且蘇聯之主義根本與公使團之政策相反。蓋公使團根據辛丑平等條約。劃使館區域脫離中國主權之範圍。而使團管理。與蘇聯平等公正之原則不相容。故使團對於俄國使館之交還。故意多方爲難。當時公使團照覆外交部聲明。當中國停止俄國使領待遇時。關係辛丑和約各國公使會議決該俄國使署迄各關係國均經承認之俄國代表來駐北京以前。應由各關係國公使共負保管責任。業經中國外交部承認在案。故關於移交前俄使署一節。應由俄國正式派遣中國之外交代表前來請求移交時。始能予以考慮。蓋表示中國政府無請求移交之權。又表示須經關係各國均經承認之俄國代表始能移交也。外交部當以俄國

使館在中國領土以內。使團不能拒絕中國要求之旨駁覆之。然使團仍不理會。一時中國輿論非常激昂。國會議員團發表兩次宣言。反對各國對於中東鐵路與俄國公使館之行爲。公使團乃讓步。由領袖公使照會外交部與俄大使。准由俄大使接收俄國公使館。但商定仍須負共同管理使館區域之義務。此事乃告一段落。

中俄會議終因故延宕而未開。歷來帝俄所侵略之中國領土。（見第一章）蘇俄雖屢有返還之宣言及誠懇之表示。終口惠而實不至。迄未還我寸土。且對外蒙古之侵略。變本加厲。日甚一日。欲使全蒙成爲蘇聯之一邦。此則吾人所亟宜注意。毋使我中華民國同種五族之一之蒙古民衆淪於萬劫不復之境。必使脫俄纜吻。與各省平等享有幸福。政治典章齊於一致。權利義務。概得平均。然後中國始得真告統一。而無缺憾。

蒙  
建藏  
要是省  
藏蒙放解  
族漢和族民  
到享得的一同  
福幸的等平由自

# 上海新書店敬告同志們

革命的鐘聲，蕩起我中華民族的昏沉迷夢；吶嘯！努力的齊奔赴於革命之途，以求光明的生路。本店在這青天白日的『新光』照耀之下，革命的使命，當然有一分的擔負。但是，現在軍事初定，革命尙未成功之際，必須有正確的理论，縝密的研究，方足以促進革命基礎之穩定，而不致誤陷入謬誤之途徑，致紆迴革命之路。我們抱定『革命是全民都要負責的』的遺訓，決計的努力於上項事業的工作。不作無謂的呻吟，不爲酸腐的哈哦，更不效新的肉麻哼唧；祇吶喊，呼喝，振奮我革命的大無畏精神，爲我革命的民衆服務，爲我革命的黨國服務。

同時，我們在這文藝極沉悶，外來文化積極侵略，文學日就萎靡凋殘的狀況之下；決計爲文化的光明，消耗我們狂熱的心血；使我東方文明之花，蓬勃燦爛，以得到甜蜜的果，安慰人們無限煩悶的心靈！


我們的意志，就是這兩點；我們赤裸裸的表現於人們之前，絕不遮掩紆迴，朦朧欺人。我們的出版，也根據這兩點而努力。同志的人們！如果有作品，要我們出版，我們誓本互助的精神而使得解決；尤其是無名(?)的作家，我們更竭誠歡迎！至少願意使他不感到書賈文閱壓迫的痛苦。願同志們鑒納我們這點熱烈的意志！

# 俄羅斯侵略中國痛史

中華民國十八年六月初版

編輯者 直公  
校勘者 文止庵

每部——一〇四頁  
定價——八角



全書——一冊  
初版——印三千冊

發行者 新光書店  
分售處 各大書局

總發行所——上海南京路巡捕房西首德裕里

# 國民革命北伐成功史

北伐唯一詳細記錄

民國空前戰史巨著

革命軍的統計

革命戰的信史

徵集者史地研究社

主編者文公直少將

全書洋裝兩冊

定價大洋二圓

國民革命，軍事方面已達到北伐完成之目的，其間經過：戰史、軍略，革命健兒豐偉之戰績，死事先烈悲壯之事實，國民革命艱難締造之信史；以及南北戰役，詳細情形，皆爲革命民衆所亟欲晰知者。本店特情熟於革命歷史之軍事專家，廣爲徵集各集團軍各省各軍暨海軍空軍之革命史料，軼聞；務求詳盡確實，經年累月，始編纂成書。全書都十餘萬言，上溯北伐出師以前，訓練黨軍，奠定全粵；以至燕遼底定，再得武漢，編遣各軍；所有軍事、戰役、靡不詳敘無遺。各軍勝敗之原因，作戰之方略，社會之關係；時代之背景；尤能獨具卓識，議論透澈。至戰役之時地，勝敗之原因，勳員之姓名，傷亡之確數，皆經調查翔實。確爲不可多得之革命史實；我國戰史之空前巨著。本黨同志，革命民衆，不可不讀此書；歷史學者，陸海軍人，以及政法學報……各界，尤當置備參考。

# 國民革命的人運動



王敬新著

全書一冊

定價三角

上海新光書店出版

人得邪工們產實的及爲本是容做人國  
之深說運能黨分的黨經黨書在易工人民  
真切所之穀徒析的驗服著共得人都革  
相認朦途澈之國義之務作黨到運知命  
。識而徑底工民理所有者清正動道，  
共誤，明運革，得年歷亂確的的解  
產入而瞭的命著，；任真的工。放  
黨歧不國不之爲並特政理認作但勞  
徒途致民同工此根將治的識，是工  
欺，爲革；運書據其工今，却怎，  
騙同謬命使與。正研作日尤是樣這  
工時妄的人共切確究，。其不去是



版出新店書光新海上

# 民生史觀之研究

民  
生  
歷  
的  
是  
中  
心  
史

▲著者……文公直

▲全書……一冊

▲定價……三角

民生史觀，是孫總理救中國、救世界、的偉大思想的結晶。本書作者文公直先生特將總理垂訓的精義，詳為闡發。理論正確，解釋縝密，足以糾正謬說，使人們得到真確的認識。



帝

全

定

國

書

價

主

一

五

義

冊

角

對

華

之

侵

略

——編直公文——

近來國人因革命怒潮的激盪，睡  
 獅猛醒，法意外交，亟於需要一  
 種詳確而透澈的刊物；本書就是  
 適應這需求而產生的。赤裸裸地  
 將帝國主義的陰謀毒計，硬腕鐵  
 蹄等一切裏幕秘密，背景原因，  
 都一一詳晰寫出；洞見結釐，直  
 入腠理；迥非祇記表面外交的事  
 件者所能比擬。欲明瞭帝國主義  
 對華侵略之具體事態，秘密關係  
 者，不可不讀。

上海新光書店新出版

# 中華民國革命建國史

出版預告

中華民國建設的經過——國民革命的歷程——千變萬化，事態無窮。人們都想詳細明瞭這經過歷程中的一切事態。但是歷年來，這一類記載革命歷史的出版物，不是太略，就是太理論化，欲求一部有系統，而且記載確實的，實不可得。本店因此商得大同學會的同意，將他們會中歷年來徵集所得的革命建國珍貴史料，一律搜齊，並請黃介民先生會同洪振九、秦來甫、王敬、葉叔炎、余鶴文、公直、諸先生等——歷史、文學、經濟、各專家——悉心整理，編輯成書。在編輯過程中，所用的參攷書報，達百數十種，且多為世所罕見之筆記、日記、抄本，或已絕版之品，其名貴可以想見。


現在全書已經告成，都五十餘萬言，分訂三卷，用二十五開版本，詳校精印。所有自孫中山先生發起興中會，以及同盟會等，各革命團體之原因與事實；民國成立時各省光復之情形；民元民二政黨之紛爭，政變之經過；護國護法諸役之因果事態；與南北政府一切政法、交通、內外債、僑務、邊情、陸海空軍、事戰史等事實；中國國民黨歷次改組之沿革；北伐革命之經過；歷來外交失敗之原委；工商學歷次運動之情形；以迄最近三大大會、鄂粵軍事為止；舉凡關於國家歷史之事態，無不將其原委、影響，以及背景、因果，原原本本詳細敘述。至於態度之公平正直，文筆之顯豁暢利，尤為出色當行。凡欲知中華民國締造之艱難，國民革命之詳細經過者，不可不讀。革命同志、歷史學家及愛好文學者，尤宜人手一編。國民的民衆，更應細讀也。

民國二十一年五月五日出版

上海图书馆藏书



A541 212 0012 5526B



04220